

KUKÒOKESHA BINTU BYÔNSÒ



Ndi ànu ne disàkidila dyàbùngì be bwà kwikala mwab'ewu. Ndi ngànyisha masambila ènú panwàkuumvwa bwà njiwù mikesè yìvwà mingenzèkèle. Cìdi ànu cileeja ne Sàtaanà kènà mwà kukwangata pàdi Nzambi kàyì mujikije neebè to. Nènku ndi ncinka ne bààbùngì bàà ku nwènù bàdi bàdikonka mùshindù ùdìbi...cìdi cyenzèke. Ntu mupetèpètè dyèsè...Bu munùdi bamanyè ne ndi...mudimu wànyì ùntù mpicishilakù dìbà, anyì kùntu njikijila luteetùkù, kùtu anyì kuya kalòba anyì kuya katuuta bingoma mwaba wa dilongela ndudì, anyì kuya kaasa nyama mwitu, anyì cintu kampànda cyà mùshindù awu. Ndi ne disànka bwà bwalu abu. Bu mèmè mwikale nnàya ndundu wa golf, mvwa mwà kwikala pambèlu pààpa pàdi bakàji bavwàla bu bàdi butakà apu. Nènku bu ngiikala—nènku bu ngiikala munàyi wa ndundu, nudi bamanyè cìvwàci mwà kwikala, cyòci aci. Kàdi ndi—ndi ne disànka bwalu cìvwa nkuya pambèlu, bu mùdi mu dilòba, dilemba ne bikwàbbò.

² Nènku ntu mutàmbe kunanga misangu yònsò bingoma byà Weatherby Magnum abi. Nènku ndi ncinka ne muntu kampànda ùvwa mwà kwikala mucìnsùmbile bu mèmè mwà kwikala mwàmbè cintu kampànda pa bwalu abu, kàdi mvwa mucilamè mèmè mwinè bwalu cìdi ciyiila mfranga yàbùngì mipite ya kucitùdila, kàdi pàànyì mumanyè bamissionaires bàdi kabàyi ne bisàbaata ku makàsà to. Kàdi dìbà adi kulekela muntu kampànda ùcìsùmba, kwangata mfranga bùngì nàнку kuyitùdila cingoma anyì? Mwanèètù Art Wilson mmupèeshe Billy paanyimà pàapa cingoma cyà mòdelè wà Winchester àbìdì aa, cyà Roberts cyà nkàmà yìbìdì-makumi àtaanu ne mwandamutekète aci's. Mukalenge Weatherby mmupàtùle dibèji dyà ne yèyè ùvwa mwà kwangata cingoma aci ànu bwà kushintululamù cintu kampànda bwà kwenza cyà Weatherby Magnum ku cyòci aci, kakùyì njiwù nànsha yà kànà to. Nànku Mwanèètù Rodney ùtu ùlwa mu èkèleeziyà emu, Mwanèètù Rodney Armstrong kucitùmayè e kucishintulwishayè mu cyà Weatherby Magnum. Byàkenzeka ne kacìvwa cishintulula bimpè to. Pa nàнку pangààkacikùmà, ncyà Weath-...Kùmpànyi wa Winchester ùdi wàmba ne cingoma cyàbò cidi mwà kutwàla bukolè bwà bujitu bwà kilòs nkàmà yìsàtù ne dikumi ne yìsàtù. Nudi bamanyè cìdici cìvwànyìne kwikala's.

³ Nènku mvwa ànu ne cingoma aci cyela muulu, twètù kupweka ne Mwanèètù Wood kuntwaku, nènku cìvwa ànu ntàntà wa cyàlà cìmwè ne dísù dyànyì, mùshindù awu. Nènku bukolè bwà kataayishà bujitu bwà kilòs binunu bisàtù lukàmà ne makumi àsàtù mu ntàntà wa mètres makumi ànaayi ne àsambòmbò, tundimbà twà cingoma kupàtukatù kuya ntàntà

wa mètres makumi ànaayi ne àsambòmbò, bùlu kupinganabò paanyimà mùshindù ewu, ne cingoma kunsùnsukilaci ànu mu cyanza cyànyì. Ànu ludimì lwètù lwà mudilu elu lubànde lwàmba kufika mu plafond mwàmwa, kàdi aci ki cyònsò címvwà mumanyè mu kasùnsukila kàà kasunsa kàmwè anyì túbìdì. Nènku, pàndì tangila bìmpè, mashi àvwà àsòpoka mùshindù ewu, nè mèmè e kushààla mwelè cyanza cyànyì muulu mùshindù awu bwà katanci kakesè. Nènku Mwanèètù Wood... Mèmè kuteeta bwà kutàngila, kàdi ncìvwà mwà kumòna ne edi dísù to, ne ncìyì mwà kuumvwà nànsha kakesè to. Mvwà ngùmvwà bu uvwà wendela mu lupeepèlè. Ki mèmè kumòna Mwanèètù Wood ùpàtuka wènda ùlonda nyama bwà kumòna mwaba ùvwà dísashi dyàsè, ki mèmè kuteeta bwà kukòka ntèmà yèndè. Pashìshe kuyayè kuntwaku ne twètù kubànda. Ne cijèngu cyà tundimbà cìvwà cinyùngùlùkile dísù. Ki kwísù kwànyì kumwèkakù bu kwasa ànu dyàmpà dyela munyìnyì, mùvwàci cintaayikile mumpàla. Nènku tupesa tunène twà bujitu tupàtàmè pamutù pàà dísù, ne twenze cijèngù ànu ku nyùngulwìlu wa mufùbà wà mpàla ne mufùbà wà kabalùbalù ewu. Ngàngàbukà Adair kubipàtulaye.

⁴ Ndambù wa matùkù paanyimà, mu bushùwà bwà bwalu, ditùkù dyàkalondà, Doc ùvwà ùsanganyibwà yèyè mwine mu lùpitaadi. E kuntùmabò kùdì mpilù bwà dísù. E kusanganayè cijèngù, ànu lwà mwìnshì mwà kamònyì, cyà tundimbà tutwè ku makumi àsàtù tutùkìne mu kamònyì kàà dísù. Katwèna mwà kupàtudiibwà to. Tubwele, tupangile ànu kamònyì kàdi twenzè cijèngù cinyùngùlùke mùshindù ewu. Yèyè ne: “Cintu címwèpelè cindì mumanyè,” wàkafùndila Ngàngàbukà Adair mukàndà, wàmba ne: “Mukalenge mwìmpè’s ùvwà ne cyà kwikala musòmbe nendè mu cibàsà aci, bwà kukùba musadidi Wendè, bwà cyanàànà nànsha mutù kawùvwà mwà kushààla to.” Cyonsò cìvwà Mwanèètù Wood mwà kwikala musangàne cìvwà ànu cyà kuumukila *apa* too ne kwìnshì, nwamònu’s. Bukolè abu bùvwà butaayike! Ncyèna mumanyè mùvwàbò bucyenzè to. Kàdi bùlu bunène bwà bujitu bwà cingoma cyà mòdelè wà makumi mwandamutekète abu bùvwà butaayike bwalùkile paanyimà, bu nwìkala bamanye mwaba ùdì Kànsànkì kàà Balaminyi kàsanganyibwà, lwà paanyimà pwònsò apu too ne ku lupangu lwà tushà. Nènku citùpà cyà cingoma aci katùtu bacipete to.

⁵ Pa nànkù, bìdì ànu bileeja cintu kampànda. Nengìkale ne diyìsha ditùkù dikwàbò pa cyòci aci, bu Mukalenge mwà kwanyisha, pa “Dikùdimuna dyà mucìma ndìmpè ànu, kàdi bìkèngela wèwè kudìlama dipwèkèle. Dyòdì kadiyì dilongolwela bujitu bùdìdì dyàmbula to, neditaayike dìbà kanà dyònsò.” Ncyà bushùwà. Nànkù kùteeci bwà...Mbitàmbe bwìmpè kwikala mwàkakufùkàbo. Um-hum. Kàdi kì nkusekiibwà kùdì bàmwe...[Mwanèètù wa bakàjì kampànda ùdì wàkula

ne Mwanèètù Branham—Muf.] Mpindyewu tàngilàayi, nwamònu's. Cìdi. . .Kaa, mu bushùwà bwà bwalu, nudi mwà kudifwànyikijila ne maalu avwa mwà kwambiibwa mùshindù awu.

6 Kàdi, bwà ku dyànyì dimanya, kakwèna—kakwèna cintu nànsha cimwè. . .Mu bushùwà bwà bwalu, maci àànyì, nudi mwà kudifwànyikijila, àcìdi ànu èla ngonga díbà dìdì cikòlokolo eci cìdila. Ki bwà cinyì ncìvwa mwab'ewu mu dindà emu to. Udi uyiikila, ucyùmvwa citùdika paanyimà ne kumpàla. Kàdi bàvwa baye naanyì kùdì mpilù, kwambayè ne: “Lutàndàtanda lwà dìcì kalwèna nànsha luwùle to. Nènku díbà adi dísù,” yèyè ne: “newikalè ànu ne lumònu lwèbè lùmwlùmwbè lúvwa naalù kwònsò eku alu.” Wàmba—wàmba ne: “Cìvwa cibwele mwinshì mwà mèsu. Ncyenzè ànu cijèngu ku nyùgulwilu wa kamònyì kàà dísù, cisòmbemù.” Wàmba ne: “Newikalè misangu yònsò ne tundimba.”

7 Mémè kwamba ne: “Mvwa naatù kwambwila pàncìvwa ne bidimu bìbìdì, atu ntwa ku cikwàbò aci.”

8 Mwanèètù Roberson udi paanyimà wàwa, mvwa mumubiikile ngènda mmulondela bwalu abu. Kwambayè ne: “Abu kabùkutondì to,” yèyè ne: “ndi ne kilo anyì kilo ne ndambu mu mémè emu,” mwàkambàye. Yèyè's nkòlomò wa kale wa ku mvità. “Pa nàнку katwàkukwenzela bwalu to, mémè ntu naatù bùngì kabùyì kubala.”

9 Nènku ndi mvùluka cikèèna—kumòna cyà Mukalenge aci kì nkwanjì kwenza ntàntà mule to. Nudikù bavùlùke ne mémè mvwa munùlondèlecì mwaba ewu anyì? Bupòlè bwà Mukalenge mu dindà adi, wàkamba ne: “Kùcìnyì ní ncìnyì ní ncìnyì, kwònsò kwà kuya, anyì ní ncìnyì to, bwalu Bwikadi bwà Yesù Kilisto bùdì kabùyìkù mwà kupangila abu bùdì neebè kwònsò kùyaaya.” Pa nàнку yèyè kènà mwà kucyènza to, Sàtaanà kènà mwà kunshipaku to pàdì Nzambi kàyi mwàmbè ne “nkujike to.” Nwamònu anyì? Mmufwànyine kuciteeta, kàdi kàkwangulakù mpasu mu dicyènza nànsha.

10 Nàнку díbà adi, cintu cyà pabwàcì, mvwa ànu mutùngùnùke, nya ku disangisha dyànyì, bwalu mvwa mwà kumwèna ku dísù dyà dyàbakàjì edi bímpè, kàdi mvwa ntùngunuka ne kuya mu disangisha nànsha bishi. Nènku pashìishe bòbò, mwanèètù wa balùme uvwa uya ku diitu dyà ba-Indiens, ùvwa ne cyà kushipa masangisha awu, anyì kulààdikija, too ne pàngààkaalukilà ku Côte Ouest ne kubànda ku Côte Ouest. Pa nàнку netùkenzè masangisha kuntwaku. Nènku mu cikondo eci, Mwanèètù Arganbright mmupetàngànga naanyì, nènku pashìishe pàjika masangisha awu, nemandè kàbìdì ku Anchorage, mu Alaska. Ki cìmvwà ntàmba kweyemena bikolè menemene. . .

¹¹ Bààbùngì bàà kunùdì mbamanyè cikèèná-kumòna címvwà mumòne, múmvwà mwâsè ours wa cisengasenga, ours wa cisengasenga wa mètres àbìdì ne citùpà, (ne èkèleeziyà mmuvùlùke ne mvwa mubùlondè kaaba aka), ne mbowà awu. Mvwa mupetè ckwàbò. Vùlukàayi ne cidi pa mikàbà yà mèyi mwab'ewu, mvwa mumòne ours munène wa bujitu mufìkùlùke. Awu ùvwa mufwànyine kwikala Kodiak ne kàvwa mufwànyine kukùmbana mu Canada mwàmwa to, bwalu kayènamù to, nudi numòna's. Kàdi mwaba wònsò wikalàye awu, ngwòwò. Neyìkalèmu, aci's ng'EMU MÙDÌ MUKALENGE WÀMBA. Neyìkalèmu. Nwamònu anyi?

¹² Mpindyewu ndi nzwèla twasàkidila bwà dinsambidila dyènu. Mvwa mumanyè ne bààbùngì bàà kunùdì nuvwa munkaci mwà dinsambidila panùvwà buumvwe ne mvwa mutàpiibwe. Ne kasumbu kakesè kàvwà ànu...Mwanàanyi wa bakàji udi paanyimà pàapa wàwa, Rebekah, mufundile Mwanèètù wa bakàji Dauch udi ulwa kaaba aka mu èkèleeziyà emu, mukàndà, ne mumulondèle bwalu abu. Ki kubiikilayè Meda ndambù wa malòlò paanyimà pàa cyòci aci, wamba ne: "Ncyèna mumanyè ne cyàkawkàcisha anyi to, kàdi bònsò bwètù musùmbà mujimà tuvwa badisangishe kunweku." Mwambi wa ba-Méthodistes ne—ne Mwanèètù Brown, cilongo cyàbò ne bòbò bònsò bàvwa badisangishe, bansambidile butùkù bujimà abu. Yèyè ne: "Ncyèna mumanyè ne Nzambi ní wàkumvwa anyi to, kàdi, tuvwa bamanyè ne Mwanèètù Branham ùvwa musambidile bantu bààbùngì, ki twètù kwela meeji ne tuvwa ne cyà kumusambidila." Awu's ke mùshindù wà masambila àtuye ùtèèleja, nwamònu's. Ncyà bushùwà, à mìshindù yà nàнку awu!

¹³ Mwanèètù Crase, umwe wa ku bânà bèètù bàà mwab'ewu, Sàtaanà mumudimbàte matùkù mashààle aa, kudikùmayè ku mùkidì, kaa, kukòsaci wendè...yònsò nkòong. Ncyèna mmòna mwàkapàtùkàye muntu amu ne mwoyi to. Ki nàнку kushààlayè mulààle muntwamu mu lùpitaadi ne kwambayè ne kùvwa mwakùnyèndè wa balùme mufùmine ku New Albany, dyèndè Medcalf, ki kwambayè ne: "Mwanèètù Crase, ndi—ndi—ncyèna mukùmbàne bwà kulwa kukusambidila to, kàdi." mwàkambayè, "Mukalenge mmucitèèke ànu pa mwoyi wanyi, kakùyì mùshindù wà mèmè kucyèpela to." Kì kulwaye ànu kutwà binù panshi, ne kwenzaye kaadisambila kakesè e kupàtuka. Nzambi kwondopayè Mwanèètù Crase ànu pa cibànzà. Nwamònu anyi? Dìbà adi, nwamònu's, ndipà dyà dyondopa mu Mubidi wà Kilistò, nudi numòna's, cidimba címwè bwà ckwàbò.

¹⁴ Kwèdi meeji ne bwalu udi ànu cidimba cyanààna; ne, udi cidimba ànu bu mùdì cidimba kanà cyònsò eci. Eci's mmunu wanyi ànu mùdì dibòko dyanyi edì diikàle dibòko dyanyi, anyi mùdì dicì edì diikàle dicì dyanyi. Nwamònu anyi? cidi ànu cidimba cyà mubidi. Nèнку twètù bònsò...Cidimba címwè

cyòci cisaama, bidimba byònsò bidi bisaama pàmwè naaci. Bùmwè, bùmwè bubèneshiibwe kaayi's wè! Mpindyewu ndi. . .

¹⁵ Nènku paanyimà pàà cyòci aci, mpindyewu, ndi mwangatè masangisha makwabò kàbidi ne mèmè kushiya cipòòlò cikesè kuntwaku bwà dilòòlò dimwè kàbidi ne tabernacle, bu Mukalenge mwà kwanyisha. Nènku, bu Nzambì mwà kwanyisha, mu dyàlumingu dilwalwà edi mu dindà Ndi muswe kwakula pa *Kajila Kàà Mupròfeta*, ne pashiishe, ku tabernacle.

¹⁶ Mààlabà dilòòlò, anyi mu dyàlumingu dilòòlò, nêngiikale mwab'ewu ku Gospel Tabernacle, umwe wa ku bânà bèètù, Mwanèètù Ruddell. Ndi muswè kwakula pa cyena-bwalu cyà ne: *Kukòsa Kajilu*, bu Mukalenge mwà kwanyisha.

¹⁷ Nènku pashiishe diibìdi dyàlondà, netwikale ne cyà kuumuka dîbà adi batàngile ku Wisconsin, ne mpungilu wa mu citùpà cyà buloba wa Beena Kantu-ku-byanza bàà Èvànjeeliyò mu Kaabujimà. Nènku nêngiikalè kuntwaku bwà malòòlò àsàtù. Aci's nku. . . Billy, cimenga aci dîná dyàci ncinyi? Bààkidila. . . [Mwanèètù Billy Paul ùdi wàmba ne: "Green Lake."—Muf.], Green Lake, mu Wisconsin. ["Diinâyì."] Dîbà kaayi? ["Diinâyì, diitànù, ne diisambòmbò; ditùkù dyà dikumi ne mwandamutekète too ne ku dyà dikumi ne citèemà."] Mu diinâyì, mu diitànù, ne mu diisambòmbò; dyà dikumi ne mwandamutekète, dyà dikumi ne mwandamukùlù, ne dyà dikumi ne citèemà, ku Green Lake, mu Wisconsin, mu mpungilu wa citùpà cyà buloba aci.

¹⁸ Nènku pashiishe mu dyàlumingu, dyà matùkù makumi àbidi, nêngiikalè mu Chicago ku cibambalu cinène cyà Cilongelu Citùmbùke, cibambalu cìmwècìmwè aci mutùvwà tusanganyiibwa musangu mushààle ewu amu. Nudi bavùlùke dîná adi anyi? [Mwanèètù Billy Paul ùdi wàmba ne: "Stephen Mather."—Muf.] Cibambalu cinène cyà Cilongelu Citùmbùke cyà Stephen Mather, bwà mu dyàlumingu mu mapingaja.

¹⁹ Pashiishe mu dimwè ndi njikija ku. . . ngaapù mwoyi dîná dyà mwaba ùvwà Mukalenge mundèjè mpungilu cikondo aci awu bwà Nsangilu wa Bambi bàà ku Chicago, bàdisangisha bwà kukòkangana naanyi pa byena-bwalu, nudi bamanyi. Mèmè ne: "Ki Mukalenge kundeejayè pa mwaba awu." Ndisangisha dyà dilayangana ne Mwanèètù Joseph Boze, udi ne cyà kulwa mwab'ewu mààlabà ku ndekè bwà kumònangana nàànyì, ne difestò dyà dilayangana nendè yèyè mu dimwè.

²⁰ Pashiishe tudi twalukila buludi kumbèlu ne tuumuka dîbà adi, bwalu dîbà nediiikalè dikùmbàne bwà kuumuka kuya ku Southern Pines, mu Caroline du Sud, anyi mu Caroline du Nord. Nènku pashiishe tupweka ku Columbus, mu Caroline du Sud. Ne pashiishe tuya ku Cow Palace Iwà ku Côte Ouest. Nènku pashiishe tubànda tukòsela ku Grass City, nènku tutungunuka batàngila mu Spokane, tutùngùnuka ne mu Canada, ne pashiishe

tubwela mu Alaska. Pa nàнку ikàlaayi nutùsambidila, tudi dijinga menemene ne masambila ènù.

21 Kàbìdì tudi balongèshùibwe mu Mifùndu ne maalu wònsò àdi ènzeka bwà dyàkalengèle dyà aba bàdi banange Nzambì. Nènku ndi ngiitabuujà, kwambwila ku eci, ne pa kumòna lulamatu lwà cisàmbà ne bikwàbò. . . Muntu kampànda kwambayè ne: “Mmunyi mwàfwànyinàbi kwenzeka, nè ncinyi cyàcilekeelà Nzambì’s?” Mvwa mwà kwikala mushipùibwe mu njila pàmvwà ngènda nya kuntwaku, cintu kampànda anyi cikwàbò, Yèyè—Yèyè úvwa ne cintu kampànda bwà kucyèpula. Vùlukaàyi ne, Mifùndu kayèna mwà kupangilakù to: “Bintu byònsò bìdi bikwàta mudimu pàmwè bwà dyàkalenga dyà aba bàdi banangè Nzambì.” Nènku, mèmè mumanyè mwoyi wànyì, ndi muMunangè. Ndi—ndi muMunangè ne mwoyi wànyì wònsò. Ne cìdi citùfikisha ku dilamakana pàmwè ndambù.

22 Nènku, pa kwela meeji mpindyewu, ne muntu yònsò udi mucyumvwe, kènà mwà kuumvwa ne mmùshindù kaayi mene ùndi mushààle ne mutù ku citùnjì anyi mupànde bwoyà mu cibààlà to, nudi numòna’s, wa bwalu nsangananyiibwa ànu munkaci mwà cikùminà cyònsò aci. Ciinè aci, pabwìpì naanyi nùnkù ewu, civwà mwà kwikala pàmwàpa cikùminà cyà bujitu bwà kilò nkàmà citèemà cikutaayikilà ànu mumpàlà mwèbè amu. Nwamònu’s, aci’s mbukolè bukùmbàne bwà kukusùnsùlula, nwamònu’s, bukukòmba ànu nàka. Piikalàci cìtaayisha cingoma cyà cyamù cyà bujitu mùshindù awu ne cikùpa tundimbà atu mùshindù awu mu ntàntà wa mètres makumi àtaanu ne àsambòmbò, nènku—nènku bìvwà moomù, bìvwà bikèngela nwènu kumòna ànu cingoma aci. Kacyèna cìmwèka nànsha bu cingoma ciinè to, cìdi ànu tusùnsùkila twangulula.

23 Ne pashìishe, mu cyòci aci, kakùyì cintu nànsha cìmwè cìdi cinyangùke mu mèmè to. Butùmbì kùdi Nzambì udi ne mwoyi’s wè! Kundama ànu ntàntà mukùmbàne bwà kubènga kuya kuntwaku too ne mwàfùmi dīyì kùdi Eddie ne kàbìvwà bikèngela mèmè kulwa pa dībà adi nànsha. “Ngàsà udi ukèmesha, dīyì dipòle be, dyàkasùngila mukèngi bu mèmè!” Ne cìdi citùfikisha ku dimanya ne, bwà kwanyisha Nzambì bwà mùdiye neetù. Nzambì ùdi neetù, ne mùshindù mwinè wutùdi ne kusàkìdila’s wè!

24 Mpinyewu, mvwa mwàmbè mu dindà emu ne mvwa ngèèla meeji ne mvwa mwà kulwa, pashìishe mwanèètu wa musinga mukolè ewu pangàlùkìdì. . . Mèmè kwambila Mwanèètu wa bakàjì Wood leelù ewu, ngèèla meeji ne Mwanèètu Neville. . . Billy kumbiikila ne kwamba ne: “Tèelejà mukenji pawikalà mwà kuwùtèeleja.” Nènku ndi ngèèla meeji ne kalatalata kàà cyamu nkalamùke kàdi e kumbwela kwinshì kwà dīsù dyànyì eku, kàvwa menemene kàntàcisha kakùyì diikisha to, kàdi kaapàtuki mpindyewu. Mbakàpàtùle. Ki pashìishe kwambayè. . . Dilòòlo

edi mémè kudyàmbidila ne mwawa mwà kupweka, ne pàmwápa mwanèètù wa mushinga mukolè awu ùyiisha mùshindù awu, ndi mumanyè cìdì bwalu díbà dyúdi ne mudimu munène pèèbe ne díyì dikupàte, nudi bamanyè's, nènku—nènku muminu ùkoosha ne ùkusaama. Ki mémè kudyàmbidila ne nèmpwekè, ne mémè kwambula ndambù wa Mifundu bwà kubala. Mémè kudyàmbidila ne: “Mèèsà à Mukalenge dilòlò edi.”

Ntu misangu yònsò ànu muswè kwangata mèèsà à Mukalenge.

²⁵ Pashìishe mwawa ne balunda bàànyì bàbìdì, bàdì mwab'ewu mwaba kampànda. Ncyèná mmóna bimpè menemene to, bu munùdì nuumvwa. Kùcìdì ànu lulengu lwà bwanga bwà belladone abu mu dísu didì dibaalùlùke, cyènzè ànu bu cibungibungi. Nènku ewu bàdì mwab'ewu, mbalunda ne bilongo byà mwanèètù mwímpè wa mushinga mukolè, F. F. Bosworth, udi mu Butumbì awu. Pa nàнку Mukalenge àbènèshè bantu abu, tudi tufùma ku dibàsambidila mu cibambalu cyà paanyimà.

²⁶ Mpindyewu, kanùpu mwoyi to, mu diisàtù dilòlò ndisangisha dyètù dyà milòmbò dyà munkaci mwà lumingu. Nènku ndi ngèèla meeji, Mwanèètù Jackson, dyèndè didì mu diinâyì dilòlò. Nènku Mwanèètù Junior udi apa ewu ùdi mu. . . Anyi, Mwanèètù Ruddell ùdi mu diisàtù dilòlò. Nènku tabernacle wa mu Utica didì mu diisàtù. [Mwanèètù Neville ùdi wamba ne: “Aci mmu diinâyì dilòlò;”—Muf.] Mu diinâyì dilòlò. Nènku pashìishe mwab'ewu mu dyàlumingu mu dindà bwà mudimu wa disangisha.

²⁷ Ne díbà adi mpindyewu, nènku mu dyàlumingu dilòlò ndi ne cyà kujikija ndongamu ne Mwanèètù Ruddell. Mwawa mwà kwikala mucyenze mu diisàtù dilòlò, kàdi, lumingu lwàlondà, kàdi ncyèná mwà kwenza nàнку to, pa nàнку bìvwa bikèngela bwà mémè kucitèeka mu dyàlumingu dilòlò. Kàdi mpindyewu bantu bàà ku tabernacle eku, shààlaayi ànu kaaba aka ku tabernacle eku, nwamònu's, bwalu nèmbandè kwà Mwanèètù Ruddell bwà dilòlò adi ànu bwà kwakula, kì mbwà mudimu wa dyondopa to. Nènku, kàdi vùlukàayi ne, shààlaayi ànu pa mwaba wa mudimu, apa mene ku tabernacle eku. Ewu kì mwaba wènu, nwamònu's. Nàнку awu netwìndile cikondo cìmpè. Nènku díbà adi nwènu bònsò túsambidilaayi patùdì tutungunuka apa.

²⁸ Ndi mutwishìlwe ne Nzambì neàtwìlanganè neetù dilòlò edi mpindyewu ànu kumpalà kwà mèèsà à Mukalenge. Nènku mpindyewu ngèèla meeji ne. . . Ki ónsò àtùdì nawù, bu mamanyisha, bwà atùdì bamanyè anyi? [Mwanèètù Neville ùdi wamba ne: “Eyowà.”—Muf.] Mpindyewu, mutèeka kajila. . . [“Ku Bitàlù, mààlabà mu mapingaja.”] Cinyì, mwanèètù? [“Ku Bitàlù, mààlabà mu mapingaja, pa díbà ìbìdì jaajaaja.”] Madilu. [“Ku Edmonton. À mamwèndè wa J. T.”] Kaa, èyowà. Madilu à. . . umwe wa ku batangadiki bèètù bàà ku tabernacle eku ùdi

ànu . . . Èè, yèyè ùdi umwe wa kutùdi kaaba aka. Ûtu ùpàtuka ne ùlombola ne ùyiisha, m’Mwanèètù J. T. Parnell. Mamwëndè mukesè wa mushinga mukolè awu mmufwè dilòlò adi, maamu mukesè, wa makaaya makòbàme, wa nsuki mitòòke. Nènku neciikalè ku Edmonton, mu Kentucky. Dìyiisha dyà ku citàlù nediiikale mààlabà. Ndi mumanyè ne bààbùngì bàà kunùdi bàvwa bàdikonka, ni bàvwa mwà kumutwàdila bilòngò, kàdi katùvwa mwà kumutwàdilabi to. Nènku mùshindù ùmwèpelè ùdi èkèleeziyà mwà kukùfikisha bilòngù, bàvwa ne cyà kubiiikila ku telefone bwà mwena mudimu wa ditwàdilangana mikàndà awu kabifilayè. Nènku bìvwa ne cyà kutùmiibwa mààlabà, ní byàfikakù anyi ni kabyàkafika, bilòngò abi’s, nènku bìdi bwalu bukolè. Kàdi tudi bushùwà baswè kwabanyangana dikènga, mwanèètù, ne Mwanèètù Parnell udi mujimije mamwëndè, ciinè aci, mvwa mufwishe pàànyì wanyì mààmù ànu àdi panshì aa. Ndi mutwishiiibwe ne Mwanèètù wa bakàji Spencer ne bàbùngì bàdi mwab’ewu bàdi pààbò, munkacì mwà kwabanyangana dikènga adi, bàdi bàfùminakù ku dipicila mu mindidimbi ne mabungama.

²⁹ Mpindiyewu twinyikàayi mitù yètù bwà katanci kakesè cyanààna, mu Bwikadi Bwèndè, bwà disambila. Mpindiyewu ndi muswè bwà nunsambidilaayikù. Nènku mbyenze bu kùdi lutàtu ndambù mwab’ewu dilòlò edi, bwà kuteeta kumòna, ne mùdi bukènkè ebu bwènta dibungibungi. Nènku—nènku dísù dyànyì pààdi didi bìmpè, kàdi mbeelèmu ndambù wa bwanga bwà belladone bwà kudìbaalula. Nudi bamanyè cidici’s. Nènku bìdi mùshindù awu kùkaadi matùkù àsambòmbò mpindiyewu, nwamònu’s, nènku ùvwa mwàmbe ne bìdi ne cyà kushàalamu lumingu lukwàbò anyì matùkù dikumi. Pa nànkù nwansembidilaayi. Nènku pashiiishe mutooyi ùdi ùmukila ku cikòlokolo eci ùtuuta ku bimanu awu, nunsambidilaayi. Nènku ndikù mwà kumòna cyanza cyèbè, nènku Nzambi, bu mùdi ne mulòmbu elà ànu cyanza muulu. Nzambi, andàmùnà disambila, bu mutùdi bakùngwile kakùyì tuseku ne biinàme mpindiyewu emu.

³⁰ Taatù wetù wa mu Dyulu, Wèwè udi musungùle bwà twètù kudìsangisha pàmwè. Cidi ndiswa dyà Nzambi bwà twètù kudìsangisha pàmwè patùdi tumòna Ditùkù dyènda diseemena pabwìpi apa, ne ciinè aci ku musangu ne ku musangu, Mukalenge, bwà twètù kutàmba kuseemena pabwìpi Neebè ne pabwìpi muntu ne mukwèndè, mu mwònji wà bwobùmwe, ku Mashì àkeediibwà panshì à Yesù àdi acivwija cipeepèle bwà kwenzeka.

³¹ Tudi ne kusàkidila kwàbùngì dilòlò edi, Mukalenge. Ncìvwaku—ncìvwaku—ncìvwakù ne kusàkidila kwàbùngì nùnkù bwà—bwà kwikala kaaba aka to, Mukalenge, kàdi ndi—ndi ne kusàkidila kwàbùngì Kùdi. Ndi mupange ànu myàkù yà kuumvwija mùdibi bikèngela kusàkidila bwà diikala ne

lumònu ne luumvu, ne kwikala munkaci mwà bàdi ne mwoyi pa buloba apa, bwà kutungunuka ne Èvànjeeliyò. Cìdi citùvwija baanyishi, Mukalenge, dibà ditùdi tumòna mùdìbi ànu bitàmbe kuseemena. . . Piinè apu mpàdi bantu bàà cyumvwidi cinène munkaci mwà kudikoonya mu mutù ne bàmba ne: “Mmunyi mùdìbi mwà kwikala nùnkù? Ànu cyanza cyà Nzambi!” Dìbà adi ndi ngiinyika mutù wànyì mu didipwekesha, Mukalenge, bwà kumòna ne cìvwa ncishimà cingenzela mèmè ewu, bwà mwàkengiibwàci mu nyùngùlukilu uvwa musadidi Webè mwimànyìne. Ndi ne kusàkidila kwàbùngì. Nènku mpindyewu, Taatù, ndi ndàmbula cyàkàbìdi mwoyi wànyì ku mudimu Webè cyàkàbìdi, paanyimà pàà mumanè kupweka kuntu kwàka. Kakwenàku mùshindù mu nsòmbelu emu wà kwikala mutàmbe kwikala pabwìpì ne lufù kutàmbe cikondo aci, kàdi pashiishe kwikala ne mwoyi nànsha. Pa nànkù ndi ne kusàkidila kwàbùngì.

³² Nènku mpindyewu ndi ndòmba bwà bantu bònsò bàdi bèlè byanza byàbò muulu dilòòlò edi abu, yònsò wa kùdìbo ùvwa ne dilòmbà. Nènku bààbùngì bàà kùdìbo bàdi ne kusàkidila, pàmwè ne bònsò, Mukalenge, mu myoyi yàbò, bwà byùdi Wèwè mubenzèle pààbò.

³³ Mpindyewu tudi balwè dilòòlò edi ku didisangisha dilòòlò edi mu mpùngà wa pabwèndè, mbwena kwamba ne, kwangata citùdi tubiikila ne “nkòomunyò,” anyì, “Didyà dyà mèèsà à Mukalenge.” *Kubwela mu bwobùmwè* mbwena kwamba ne: “kuyiikila ne, anyì kwenza muyiikì ne.” Nènku ki citùdi twenza mpindyewu, Mukalenge, tuiikila ne Mukalenge wetù, kubwela mu bwobùmwè, kuyiikila, kushààla baMwindile bwà dyandamuna Dyèndè.

³⁴ Nènku mpindyewu, Taatù, tudi tulòmba bwà Wèwè kutuyiikidisha dilòòlò edi ku Diyì difùnda. Ne kutùpèèsha cintu kampànda mu myoyi yètù, kushìndamijakù lwètù—lwètù—lwètù lwendu, Mukalenge, ne kutùpèèsha bukitù bupyabùpyà. Nènku bèneshaku mpaasàtà wetù, Mukalenge, mwanèètù wa mushinga mukolè, musadidi Webè, ne mukàjèndè ne dîku dyèndè; ne balami ne balubuludi, ne muntu yònsò utu ulwa mu èkèleeziyà awu. Èyi Nzambi, tùseemèjekù pabwìpì Neebè. Kwikalèku, bu mwàkambà mwedi wa kasàlà ne: “Mwònji ùdi ùswika myoyi yètù mu dinanga dyà Kilistò ùbèneshiibwè. Bwobùmwè bwà meeji à bulongo mbwenze bu bwà muulu.” Enzàku nànkù, Mukalenge. Bèneshàku bakuukwidi bakwàbò bònsò bàà pa buloba bujimà. Nènku mpindyewu, Taatù, tùcìbwilaaku Dyàmpà dyà Mwoyi patùdi baKwindile apa. Mu Dìnà dyà Yesù Kilistò, Mwan’Èbè munanga, mmutùdi tulòmba nùnkù. Amen.

³⁵ Mpindyewu, bantu bààbùngì mbaswè kufùnda mèyi mwaba ùdi mwambi mufwànyìne kubala. Ne ndi ne. . . Mu mapingaja emu paanyimà pàà mèmè mumanè kupàtuka ne Mwanèètù

wa balùme ne Mwanèètù wa bakàjì Wood, nènku tuvwa bapweke bwà kumòna Mwanèètù Gobel Roberson, ki twètù kupweka, mu nzùbu wendè wa mudimu, nàнку twètù kwalukila, ki mèmè kudyàmbidila . . . Bòbò . . . Mwanèètù wa bakàjì Wood ùvwa ùngambila diyiiisha dilenga dyà dikèma òvwà mpaasàtà wetù muiishe mu dindà emu. Ki mèmè kubanga ànu kwela meeji bwà mulùmyànà mukèsè mukwàte ne byà luse awu, ùdi mwà kwikala ne muminu ùmusaama, nànsha mèmè pàànyì, kàdi mèmè—mèmè kwela meeji ne tudi mwà kwabanyangana cyòci eci pàmwe, pàmwàpa, bu yèyè mwà kundòmba bwà kwakula. Kàbìdi ndi mutèèke tubèji tukèsè mwab'ewu tùmvwà muswè bwà kwakulapù.

³⁶ Dyàmbedi, tùbuululàayi mu Kolintò Mwibìdi 6.7 too ne ku 10. Kolintò wa Kumpàla, nshapità mwi6, mvnsà wa 7 too ne wa 10, mukùmbajilakù. Ne pashiishe Genèsè 14.18 too ne ku 19. Ne kupàtulamù, bu Mukalenge mwà kwanyisha, cyen- . . . anyì cyena-bwalu cyà mu mifundu. Nènku mpindyewu nêmbalè kuumukila ku wa Kumpàla . . . anyì kuumukila mu Kolintò Mwibìdi, dyàmbedi, Kolintò Mwibìdi 6.7 too ne ku 10.

Ku dîyì dyà bulelèlè, ku bukolè bwà Nzambì, ku byà mvità byà bwakàne ku dyàbalùme ne ku dyàbakàjì,

Ku bunémè . . . difwìshii bwà dyà bundù, ne ku mulubù mubì ne mulubù mwîmpè: bu baseswishanganyi, pèètù ne lulamatu;

Bu bàdi kabàyi bamanyike, . . . pèètù bamanya bìmpè; bu bàdi bápunga ne lufù, kàdi, mònaayi ne, ntwètù aba ne mwoyi; bu banyookùbwe, kàdi katùyi bashipùbwe to;

Bu babungàme, kàdi misangu yònsò tusànka; bu bapèlè, kàdi tuvwiya bàabùngi babanji; ne katùyi ne kantu, kàdi pèètù bakòòkeshe bintu byònsò.

Genèsè 14.18 ne 19.

Nènku Melekisedekè mfùmù wa Salèmà wàkatwàla dyàmpà ne mvinyò: ne yèyè ùvwa mwakwidi wa mutàmbe bunène wa mu dyulu . . .

Ne yèyè wàkabènesha Abraham, ne kwambayè ne: Abraham àbèneshiibwè kùdi Nzambì mutàmbe bunène wa mu dyulu, mukòòkeshi wa dyulu ne buloba:

³⁷ Nènku mèmè muswè kucibiiikila bu cyena-bwalu, ndi mufwànyine kwakula pa cyena-bwalu cyà, ku . . . Kukòòkesha Bintu Byònsò. Bu mùdi mu Kolintò emu, tudi . . . Mbàmbè ne tudi—tudi bapèlè, kàdi pèètù tukòòkesha bintu byònsò. Kukòòkesha Bintu Byònsò. Mpindyewu, ndi muswè aci. Mpindyewu mu Genèsè tudi tubala disangila dyà Abraham ne Muntu munène ewu uvwa ubiikidiibwa ne Melekisedekè ewu, Uvwa Mukòòkeshi wa Dyulu ne buloba byònsò. Pashiishe, Yèyè

ùvwa Mukòòkeshi wa bintu byònsò, Mukòòkeshi wa Dyulu ne buloba, mbwena kwamba ne, wa bintu byònsò.

³⁸ Mpindyewu, tudi bamanyè bwalu-bulonda bwà Abraham ne cìvwa cyenzèke. Ùvwa mubiikidiibwe ku—ku kaaba kàa mudimu kampànda. Ùvwa mubiikidiibwe bwà kupàtuka mu buloba bwèndè, buloba bwà beena Kasàdà, ne mu cimenga cyà Ulà, mùvwàye ùsanganyiibwa ne tatwèndè ne cisàmbà cyèndè. Nènku mwómò amu mmu bibandabanda byà Shinà, pàmwàpa buloba bubanji ne bwà bufukà. Nènku Abraham, ànu mutùdi tuumvwa, kàvwa muntu wa pabwèndè ku mèsù kwà bàà pa buloba to. Nènku mu mùshindù kampànda, kàvwa mfùmù, anyi mukòòkeshi, anyi mulombodi wa bumfùmù bwalàbàle to. Ùvwa ànu muntu cyanààna ewu. Kàbìdì ùvwa musèle mukwà-tatwèndè, dyèndè ùvwa Sarah, ne pàmwàpa mumusèle pàcìvwàye mukàjì mutekète. Kàbìdì Nzambi wàkamubikila pàvwàye ne bidimu makùmi mwandamutekète ne bitaanu, bwà nsòmbelu wa mudimu, ne cyàkabwejamù kàbìdì ne mumukwàcishi wèndè awu.

³⁹ Nènku ànu mwaba ewu ngutùvwà mwà kubangila. Mémè ndi ngùtabuuja ne pàdì Nzambi ùbìikila muntu ku mudimu, pìikalàye muntu musèlàngàne ne mwikàle ne mumukwàcishi, ùbìikila ne mukàjèndè, bwalu búbìdì bwàbò bàdi umwe. Nènku pa nàнку, mwaba kanà wònsò, nyèwù tusangana pashìishe ne Nzambi ùvwa mwà kwikala mushipè Sarah pààkeelàye mpatà ku mukenji wà Mwanjèlò, bidimu makumi àbìdì ne bitaanu pashìishe, pàvwàbo basòmbè mwinshì mwà lusànga ditùkù adi, kàdi pààkasekàye dìbà dyàkamwambila Mwanjèlò, anyi pààkambilàYe Abraham ne mukàjèndè neimite difù, nènku Sarah wàkadìsekela mundamunda wàmba ne: “Mmunyi mmundi mwà kulela, mukulàkàje mùndì emu?” Bidimu makumi citèemà, ne bàyèndè bidimu lukàmà. Dyèndè . . . matrice èndè àkaavu makàmìnyine bidimu byàbùngì, ne mubidi wà yèyè mulùme mufwè kujikè. Dìbà adi mmunyi mùvwàye mwà kupeta milòwu ne bàyèndè kàbìdì? Ki yèyè kudìsekela mundamunda.

⁴⁰ Ki Mwanjèlò awu, ne nyimà Wèndè mukoma ku ntentà, kwamba ne: “Sarah wàsekì bwà cinyi?”

⁴¹ Kàdi kucivilayè. Mpindyewu, aci’s kwambila Nzambi muMutàngile mu mpàla ne “Wàshimì’s.” Nwamònu anyi? Kàdi’s aci cìvwa cyàmbè kumushipeesha, kàdi Nzambi kàvwa mwà kwangata Sarah to, bwalu yèyè ùvwa citùpà cyà Abraham. Nwamònu anyi? Nènku yèyè ùvwa nèndè mu cipungidi, pa nàнку bìvwa bikèngela bwà kuyayè nèndè. Pa nàнку Yèyè kàvwa mwà kwangata Abraham . . . anyi kwangata Sarah, kàyì wàngata citùpà cyà Abraham to, bwalu bàbìdì aba bàdi umwe.

⁴² Cifwànyikijilu cilenga bwètù twètù leelù ewu, bàdi katùyì bakùmbànyine to, bakùmbànyine lufù patùdi twenza mpèkaatù,

kàdi Nzambì kèna mwà kutùshebeya to, bwalu Yèyè ùwva mwà...twètù tudi citùpà cyà Kilistò. Nwamònu anyi? Aci ngwètù ngàsà, bwalu tudi mu bwobùmwè ne Kilistò. Aci kî mmeeji malenga anyi, mu bwobùmwè ne Kilistò? Nàнку ki bwà cinyi, mpèkaatù yètù, patùdi tuyènza, tuvwa ne cyà kuyitonda lùkàsà, bwà ne “yidi mibi,” bwalu Nzambì ùwva mwà kwangata mwoyi wètù. Kàdi Mashì adi àndamuna pa kaaba kèètù, ne Nzambì kèna ànu mwà kusambuka Mashì awu to. Nwamònu anyi? Kènà mwà kucyènza to, bwalu mmulayi wà ne Yèyè kènà mwà kucyènza to. Pa nàнку Yèyè kènà mwà kushipa mulayi Wèndè Sungasunga to. Nwamònu anyi? Pa nàнку Nzambì ùwva mudiswike Yèyè mwinè, mutùdi mwà kwamba, mu bwalu. Nwamònu’s, Yèyè kènà mwà kushipa mulayi Wèndè to. Nènku WàkaCìlayila ku Mashì awu, ewu yònsò uvwa witabuuja ùwva ùpeta Mwoyi wà Cyendèlèlè, nènku Yèyè kèna mwà kushipa mulayi awu to.

⁴³ Nàнку tudi tusangana ne Abraham, mu ditùmikila, wàkashiya nzùbu wèndè, wàkashiya buloba bwèndè, ne wàkatàpuluka ne cintu cyònsò, bintu byèndè byònsò byà pa buloba, bwà kuya mu lwendu mu buloba bwenyi, ùkasòmbelamu. Cifwànyikijilu cyà Èkèleeziyà. Tudi balòmbiùbwe bwà kulekela byònsò bìdi pa buloba ebu, bwà kulonda Kilistò.

⁴⁴ Mpindyewu, tudi tusangana Abraham wènda ùlonda, ku cidimu ne ku cidimu. Nènku kuyayè ne citùpà cyà bantu, ciinè aci cìvwa n’tatwèndè, ne mwinè awu wàkafwila mu njila. Ki kàbìdi kwangatayè mwána wa mwanaàbò wa balùme, uvwa Lotà awu, nènku Lotà wàkatàpuluka bwà dikòkangana, e kuyayè kasòmbela mu Sodomà, nànsha nàнку ùwva citùpà cyà Abraham. Nènku Nzambì kufilayè buloba ne byònsò bìvwà mu buloba amu, kùdi Abraham, wàkabìpyànà byònsò. Nzambì wàkamba ne: “Tàngilà ku esètè, ku wesètè, ku nord, ne ku sud, ne byònsò abi bìdi bwèbè wèwè ne dimiinu dyèbè dyàlonda paanyimà pèèbè. Bèèbè bònsò!”

⁴⁵ Mpindyewu, òmwè ditùkù Abraham kupetayè ndambù wa lutàtu, ne Lotà maalu mamupeepèlèlè, muvwàngàle mu mpèkaatù. Mùshindù mwinè ùdìbi bipeepèlè ne mùdi mpèkaatù ùmwèka ùsànkisha, ne mùdiye ùmwèka kàyi ne bubì mu yèyè to. Mpindyewu, bu Lotà mwà kwamba ne: “Bu mùncìdi ànu ngiitabuuja! Ndi ngiitabuuja Nzambì, nàнку mbwà cinyi cyèna mwà kupweka mu Sodomà, nènku—nènku nebiikalè bìmpè. Mèmè ndi mwena kwitabuuja.” Kàdi kabìvwa bìmpè to.

⁴⁶ Nwamònu’s, Nzambì, pàakabìikàYe Abraham, Wàkamubiikila bwà kutàpulukayè ne bintu byònsò. Nènku cyòci aci ke citùdi ne cyà kwenza. Nzambì ùdi ùtùbìikila bwà kutàpuluka mu kaabujimà ne mpèkaatù ne: “Pàtukàayimù, kanwikadi babanyanganyi bàayi to!” Yinyemaayi, mmwènèkelu mene wa bubì. Ditàpuluka, bafwè mu kaabujimà ku yòyi’s!

Shààlaayi ntántà mule naayi. Kanwèdedi mu buloba bwàyi to, nànsha bàmba ne ùdi mùshindù—mùshindù kaayi. . . ùmwéka mulenga.

⁴⁷ Nwènu bantu, nudi bafwànyine kwela meeji kaaba aka mpindyewu, ki cyôci eci, “Mwanètù Branham, ndi—ndi muteciiḃwe mîngà misangu bwà kwiba, anyi mîngà misangu ndi muteciiḃwe bwà kunwà mfwankà.” Anyi mîngà misangu bakàji bèèla meeji ne: “Ndi muteciiḃwe bwà kulwàta bu bantu bàà pa buloba, nudi bamanye’s, bilàmbà byà masandi ne bikwàbò. Ndi muteciiḃwe,” ke bainábànzà abu. Mpindyewu, nudi nwela meeji ne aci cidi citeeta, twambe bìshi bwà mwab’ewu ùdi ne cyà kutàbaleela nkwaka yònsò mukesè, nudi numòna’s, mu mudimu wà bwambi. Ncintu kaayi citàmbe bunène mwab’ewu, ne ciikalàbo ne cyà kulumbulwila byàbùngi bipite. Bwalu, nudi ne cyà kulumbulula bwà misùùkà yènu sungasunga, kàdi twètù tudi ne cyà kulumbulula bwà muntu yònsò utùdi twambila. Nwamònu anyi? Pa nàнку Sàtaanà ùdi misangu yònsò ànu. . . Mwaba ùvwà mufwànyine kwamba, wèwè ne: “Aci kí nka nkanzu kakesè kimpè anyi? Mbibi bikolè bwà kukàvwàla, kàdi kí nkalenga anyi? Nkafwànyine kunkùmbàna ànu bìmpè.” Kàdi bwànyì mèmè. . . Mpindyewu, bwà aci, wèwè s’udi mumanyè ne ncibi. Kàdi bwà mwambi bìdi ne: “Udi mufwànyine kuya mu disangisha edi nùku, aku ki kwà kuya. Bàdi bàmba ne nditàmbe bunène, disangish-. . .” Nènku nànsha nàнку bùdi naabù mbwà kwindila ne kutèèleja Nzambi wàmba ne “ndàku,” nwamònu’s. “Kaa, udikù mwà kuya kuntweku bwà kumòna muntu ewu anyi? Ewu s’ki *kampànda*.” Nènku bìkèngela wèwè kutàbala, kwikala mudimùke. Nwamònu anyi? Kaa, mbyà budimù bwà bùngi be. Nènku mpindyewu tudi ne cyà kutàbaleela bintu abi.

⁴⁸ Mpindyewu, bivwa bìkèngela bwà Abraham kutàbaleela, yèyè pèndè. Kàdi yèyè, pamutù pàà kupwekayè mu Sodomà ne Lotà, wàkatàpuluka ne kubàndayè mu cipèèlà, kulondayè njila wa badyombòdiḃwe banyaàbanya bàà Mukalenge. Aci’s ke ciwà ne cyà kwikala cilunji cyètù. Kuditwa mu njila ne cisàmbà cyà Nzambi kùyì utàngila ne mbikolè anyi mbipeepèle to, kuya nànsha byà kumòna lufù. Ikàla mudilongòlòle bwà kuya dîbà kanà dyònsò, mpindyewu, mwaba wònsò wùdiYe mufwànyine kukubiikidila awu.

⁴⁹ Mpindyewu, paanyimà pa eci cimana kwenzeka, dîbà adi kulwakù—kulwakù mfùmù uvwa muyè ku mwalu wà mvità ne cifuku cikesè cyà bantu kuntwaku, kukòmbayè mu cibandabanda ne kubàkulaye tusumbu tukesè twònsò atu, ne makalenge makesè àvwà mapàtùke, ne kwangatabò, kubwela mu Sodomà ne kukwàta mfùmù wa Sodomà ne Gomòlà, kukwàta Lotà (mwànà wa mwanàabò ne Abraham), mukàjèndè, bàna bèndè bàà bakàji, bàna bèndè, bònsò bwàbò, ne bintu byàbò byònsò, byònsò bivwàbo naabi, e kutungunukabo

kupàtùkabò kuya, bashiye mu ditùnga ànu cipèèlà pàvwàbo bènda bàya. Kaa, cintu kaayi cyà cyènza bwòwà's wè, difutu dyà mpèkaatù ndufù! Lotà wàkamanya, kakùyì mpatà to, wènda wèndakana kuntwaku ne pàmwàpa mwikàle ne m—mwônji anyi mùyòòlolò mu nshìngù mwèndè amu, bu mupika; bânà bèndè, nsongààkàjì mitekète yà bàlwa banyangila buumùntù; ne mukàjèndè, ne bintu byònsò, ne pàmwàpa bafwàne kufwà pa dîbà kanà dyònsò wàkashikukila dîyì ditùma òmwè, ne pàmwàpa wènda ùya mu bukálengè bukàwàbò mwàba kampànda mùvwàye mwà kashààla mupika matùkù èndè ònsò à mwoyi.

⁵⁰ Kàdi Abraham, pààkajingululayè ne Lotà ùvwa mukwàcìibwe, mwinè uvwa citùpà cyà ku bintu byà Abraham awu. Ne Abraham ùvwa mufwànyine kwikala mwambè eci ne: “Nzambì, Wèwè uvwa mungambile ne bu mèmè mwà kuKutùmikila ne kubwela mùnu emu, mu buloba ebu, Wèwè neùbùmpèèshè. Mbwànyì mèmè. Ne Lotà ncitùpà cyà ku bwòbò ebu, ngàmùlondù.” Pa nànkù kukùngwijayè masàlaayi, anyi kukùngwijayè basadidi bèndè, e kubàmbika bingoma mu byanza. Ki kwangatayè basadidi bèndè, kupàtùkabò too ne mwà kadimbatanganàbo e kupeta mfùmù ewu ne makalenga makwàbò ònsò à makesè awu. Tàngilàayi cilwilu cinène cìvwàbo cikondo aci! Kàdi biikàle mwinshì mwà bulombodi bwà Nzambì, Kalààlà kàà màsàlaayi Kanène aku, wàkaditàpulula yèyè mwinè, kubàbùcikilayè ne kushipa bamfùmù abu, e kwàlukilayè ne Lotà ne makalenge makesè ònsò awu, e kubàlujayè kùdìbo, mu buloba bwàbò cyàkàbìdì.

⁵¹ Cìmfwànyì kaayi cyà Kilistò mu Abraham mwàmwa, wènda ùlonda mwena lukuna uvwa mukwàte bintu byònsò, nènku Kilistò wàkalwa ne kutwàluja cyàkàbìdì.

⁵² Mpindyewu tudi tusangana mu bwalu-bulonda bunène ebu ne Abraham, mu njila wa dyalukila, wàlukila paanyimà pàà mvità mimana kucìmuna, wàkatwìlangana ne Mukòòkeshi wa Maulu ne buloba, Melekisedekè, udi Mfùmù wa Yelusàlèmà awu, Mfùmù wa Salèmà, uvwa Yelusàlèmà, udi Mfùmù wa Ditalala awu, udi Mfùmù wa Bwakàne. Yèyè kàvwa ne taatù, Yèyè kàvwa ne maamù, Yèyè kàvwa nànsha ne mmutwàdìje ne Yèyè kàdyàkwikala ne ndekeelu to, pa nànkù aci kacìvwa cìngà cintu to ànu Wa bukòlè bwònsò. Nènku Wàkatuutakeena nèndè mu njila wa dyalukila, ùfùmìna ku dishebeya dyà bamfùmù. Wàkatuutakeena ne Mukòòkeshi, Ewu Uvwa mwena bintu byònsò awu wàkatuutakeena nèndè mu njila wa dyalukila. Ncintu kaayi cyà butùmbi's wè! Mpindyewu Abraham. . .

⁵³ Ndi muswè eci. Abraham ùvwa mupyànyì wa byònsò, ku mulayi, ki bwalu kaayi ùvwa mwà kunana cintu cyònsò cìvwà cìsanganyìibwa mu buloba abu, too ne buloba mene. Abraham wàkapèèbwa mulayi. Mpindyewu, tudi tuumvwa ne Abraham ùvwa mulanda wa menemene wa ku bònsò mu ditùnga dijimà adi, bwalu ùvwa musòmbèle mu cipèèlà, ne musòmbè mu ditalala

ne Nzambì. Nènku Lotà, mubanji, ùvwa musòmbèle mu cimenga ne wàkashààla too ne nguvènà wa cimenga aci; ùvwa musòmbèle ku ciibi, ùvwa mulumbulwishi, ne ùlumbulwisha cimenga, ne ùvwa ne mabanji ònsò ne bikwàbò. Kàdi Abraham ùvwa mu cipèèlà, nènku. . . pàngà apa mupèlè ku bònsò bàà mu ditunga amu, kàdi nànsha nàнку wàmba ànu ne mmukòòkeshe bintu byònsò. Amen! Acvi's ki cìndi muswè.

⁵⁴ Kaa, dilòòlò edi, tudi bafwànyine kwikala katùyi babanji mu bintu byà pa buloba ebi to, kàdi tudi tukòòkesha bintu byònsò. Èkèleeziyà, Yèyè Mwine, mmukòòkeshe bintu byònsò. Nànsha mùdiye mupèlè amu, cikòlà mmubanji ne ùdi ùkòòkesha bintu byònsò. Ndi muswè aci. Yèyè. . . Twètù—twètù's ke citùdi. Musambu wa kale wutùvwà twimba kùkaadi bidimu ne: “Taatù wanyì mmubanji ne nzùbu ne malaba, Yèyè mmulamè bubanji bwà buloba mu cianza Cyèndè! Mabwe à mushinga mukolè ne mbongò, ne argent ne ngòlò, Byèndè bibùcidi mbipàte, Yèyè ùdi ne mabanji àdi kaayi kwamba kumana.” Ne twètù tudi bakòòkeshi bààbì, bwalu tudi bânà bàà Mfùmù. Amen. Mwânà ke utu misangu yònsò ànu ùshààla mupyànyi, tudi bamanyè's. Èyo.

⁵⁵ Abraham ùvwa mwà kubilama, nànsha mùvwàye mupèlè amu, bimunà byèndè bìvwa bìfwa ne nzala; Lotà ùvwa mwangate buloba bwìmpè. Màyi èndè àvwa mùmè. Matùkù à myunya mikolè, ne balami bàà bimuna bàvwa mu lutàtu, ne bintu byònsò bìvwa bimwèka ànu bu ne bìvwa byènda kabèsè bwà Abraham, nànsha nàнку ùvwa ne cintu cijimà aci.

⁵⁶ Nènku, leelù ewu, mwena kwitabuuja mulelèlà mmwipata munkaci mwà bantu, mubiikidiibwe ne “mukoleshi wa maalu, munsantu mubunguluki wa mu malaba,” anyi dîna kampànda dyà bulàkù, mukoleshi wa maalu kampànda muntèndeledi, kàdi pèndè mwikàle mupyànyi wa Maulu wònsò ne buloba. “Bàà dyàkalenga mbapòle, bòbò nebàpyanè buloba.” Kaa, ekèlekèle! Bàakula bwà kunùpàtula mu kazùbu anyi mwaba kampànda, uyooba bikolè kùyi ne mfranga yà kufucila nzùbu, nànsha nàнку udi mucikòòkèshe cyònsò. Amen. Bikèngela kwenza mudimu ne kukùpa ne kunyaka bwà ndola mikesè, bwà kupeta cyàkudyà cyà meeji matòòke, bwà kuvwàdika bânà bèbèbè bilatu ku makàsà, ne kudiisha mikana yàbò mikesè yidi ne nzala ayi, kàdi nànsha nàнку mukòòkèshe, mupyànyi wa byònsò bidì apa ebi. “Bapòle nebàpyanè buloba.” Mbabùkòòkèshe. Kaa, ekèlekèle, ndi muswè aci be! Mukòòkeshi wa buloba! Nganyì awu? Mwena kwitabuuja. Mwena kwitabuuja ùdi ne bukenji, mukàndà wa bwena-cintu, ncyà bushùwà, ku Yesù Kilstò, bwà ne “Yèyè neikale mukòòkeshi wa buloba bujimà ebu.” Ncyà bushùwà. “Bapòle nebàpyanè buloba.”

⁵⁷ Abraham ùvwa ne—ùvwa ne, ùvwa mwà kukòòkesha buloba abu, bwalu. . . ne cìvwamu aci. Nzambì wàkamupèeshabù. Ne Lotà ùvwa citùpà cyà buloba abu. Pa nàнку Abraham

ùvwa ne bukenji bwàbù. Ùvwa mwà—ùvwa mwà kubiikila anyi kubùlama. E kwambayè ne: “Mpindyewu, Nzambi, Wèwè wakangenzela mulayi, wà ne cyònsò cìvwà buloba ebu ne cyònsò cìvwàmù cìvwà ncyànyì, ne Wèwè ngwakenza mulayi awu. Mpindyewu cilongo cyànyì nyèwù bacikwàte, ne byònsò bìvwàye naabi mbiyè.”

⁵⁸ Mu ngaakwilù mukwàbò, bu mèmè mwà kucitèèka leelù ewu, ndi mufwànyine kwamba ne: Èkèleeziyà ùvwa mufwànyine kwamba ne: “Mukalenge Nzambi, mwanèètù wa balùme nyèye ewu, nyèwù mulààle mwab’ewu, mukwàta kùdì kànsèrè, mmukwàta kùdì dĩaamà dyà cyàdì, ùdì ne *cikampànda*. Ndi nkwàta ku mulayi, ncintu cyànyì. Wèwè—Wèwè ngudi mungambile nànkù!” Amen! Ki bwalu mbwòbù abu’s. Pashiishe, dībà adi udi mwà kudimbata mwena lukunà awu, dyabùlù awu, ne kumushipa ànu byà mwòmùwè ne mùvwà Abraham mushipe bamfùmù abu ne kwalukila ne cidì bu cyèndè. Amen. Ndi muswè aci. Ncyà mwena kwitabuujà.

⁵⁹ Kàbidì Abraham ùvwa ne bukenji ku mulayi awu, ne mulayi awu ùvwa wèndè, nànsha nànkù ùvwa ne cyà kulwangana bwà kuwùkòòkesha. Amen. Ki bwalu mbwòbù abu’s. Mwena kwitabuujà leelù ewu, kàdi twètù tudi bapyànyì bàà bintu byònsò, kàdi tudi bapyànyì bàà dibènesha dyònsò dyà nyumà, dibènesha dyònsò dyà mubidi, dibènesha dyònsò didì Bible ùlaya, nànsha nànkù udi ne cyà kulwangana bwà katùpà ne katùpà kààdì kònsò. Ke mùshindù ùdì Nzambi mucitèèke nànkù. Cìtu misangu yònsò ànu mùshindù awu. Udi ne cyà kulwanga mvità bwà kukòòkesha cyùdì mumanyè ne ncyèbè wèwè. Udi ne cyà kulwangana bwà wèwè kucikòòkesha. Nènku ki citùdì ne cyà kwenza ncyòcì eci mpindyewu.

⁶⁰ Wèwè udi wamba ne: “Mwanèètù Branham, ndi dijinga ne dyondopa.”

⁶¹ Mulayi ngwèbè. Kàdi, wèwèku muwùpetè, kwàdyàkuwùpeta bipeepèle nànsha, ndi nnwàmbila cyòcì aci. Neùwùnyèngè kùdì Sàtaanà. Sàtaanà mmukwàte bukolè bwèbè bwà mubidi, wèwè udi ne bukenji bwà kuya kùdì—kùdì Sàtaanà, wamba ne: “Bwalùjè! Bwalùjè! Ndi ndwa mu Dìnà dyà Mukalenge, Mukòòkeshi wa Maulu ne buloba, ne mèmè ndi mupyànyì Wèndè. Bwalùjè! Udi mwangàte mwanàànyì, udi mumukòndàkàje ne nsongààlùmè mubì. Udi mwangàte mwanàànyì wa balùme mumukòndàkàje ne nsongààkàjì mubì. Ndi mbànana! Mmwòmò. Ndi nnana bàna bàànyì, ndi nnana mwanèètù wa balùme, ndi nnana mwanèètù wa bakàjì. Eyowà, Sàtaanà, udi mubàpàtùle mu nzùbu wa Nzambi, ukabàlaaba maanyì pambèlu pààpa, kàdi nyèwù ngènda mbalonda. Ndi mbànana.”

“Èè, wamanyì bìshi?”

⁶² “Ndi mupyànyì wa bintu byònsò. Amen. Mbabimpèeshe. Ndi mupyànyì, ndi mwà kunana cintu cyònsò cidì Nzambi mundayè.”

Amen. Ki bwalu mbwòbù abu's. "Mbwànyì mèmè." Udi ucìpeta bishi, ncintu kampànda cyúdi mwenzè anyì? To, mukalenge. Ndi pà dyúdi kùyi mukùmbànyine to didì Nzambi mutùpèèshe, ne ndyètù twètù, ndyètù twètù aba. Sàtaanà kènà mwà kushààla mudilamè to wèwè mumuyiilè mu Dìyi dyà—dyà bukòokeshi dyà mu Mifùndu, ne diitabuuja, bwà kwamba ne: "Ndyànyì! Ditàèkè panshi." Amen. Butùmbi's wè! Ndi muswè aci. "Sàtaanà, ditàèkè panshi. Udi mudyàngate kùndi. Dyalùjè, bwàlu ndi ne mukàndà wà didimwija. Ndi ne mukàndà mumfùndila mwaba ewu pa Dìyi ne: 'Maulu ne buloba nebìpitè, kàdi mukàndà ewu kawàkupita to.' Pa nànkù ndi ndwà ne mukàndà ewu, bwà kukukànyina, ne Yesù Kilistò wàkamba ne cyònsò cingàlòmbà Taatù mu Dìna Dyèndè Yèyè neacimpèèshè. Mèmè mwambile mukùnà ewu ne: 'tentèmùkà,' ne ncìyi ngèèla mpatà mu mwoyi wanyì to, kàdi ngiitabuuja ne cingàmbi aci necyènzekè, ndi mwà kupeta cìdi mwabè aci. Citèèkè panshi!" Aci's cidi cimwashisha lwendu. Kacyèna cimwashisha lwendu to, cidi cimwashisha lubilu. "Citèèkè panshi, bwalu ndi mulwè ne bukòokeshi bwà mu Mifùndu. Mèmè ndi mwena kwitabuuja." Nwacyümvù anyì? Èyowà's, mukalenge. Èyowà's, mukalenge.

⁶³ Abraham, ncinyì cìvwàye ne cyà kwenza dyàmbedi, bwà kwenzaye cyòci eci? Üvwa ne cyà kutèeka diitabuuja dyèndè pa lubwebwe lukolè lwà cishimikidi lwà Dìyi dilaya dyà Nzambi. Tàngilàayi, cintu cimwèpelè cìvwàye naaci cìvwa ànu musùmbà mukesè wà beena mudimu, pàngà apa dikumi ne bàbìdi. Nènku pàngà apa kùvwa bantu binunu bibìdi, bambule bingoma. Kàdi bantu bèndè yèyè kabàvwa bàsàlaayi to, bàvwa beena mudimu bèètù aba, bamunyi bàà ngombe, balami bàà mikòòkò, badishi bàà bimunà; pàngà apa ne twelè tukwàte dimòmà twà kale tùvwàbo bangùla mwaba kampànda, twà bwalu atu tutèeka mu... pambèlu apu, ne mvulà yàbùngì mitùlòkèlè, tùvwa tukwàte dimòmà. Kàdi Abraham kàvwa ùtàngila ku twelè tùvwà tukwàte dimòmà atu to, anyì ní nku dibenga kwikala ne ngabu mwinè to. Yèyè ùvwa mutèeke diitabuuja dyèndè pa Dìyi dyà Nzambi. Ki bwalu mbwòbù abu's. Ki cìdi cyènza bwalu ncyòci aci. Ki cyòci aci.

"Neùlwanganè naabu bishi pawàfika kuntwaku?"

⁶⁴ "Aci kì ncitàngile mèmè to. Bwànyì mbwà kutèeka diitabuuja dyànyì pa cìdi Nzambi mwambè. Ncyànyì, ndi ngènda ndonda cìdi cyànyì." Amen. Mpindyewu, pàdi bantu bàdi bàsaama mwà kumòna cyòci aci, mabèèdi àdi àmba kujika ànu pa dìbà adi mene. Nwamònu anyì? Bushùwà's.

⁶⁵ Pàdi ngènzàmpèkaatù mwà kumòna ne kabyèna bikèngela bwà wèwè kwenza mpèkaatù to! Bantu bààbùngì, bàdi bènza mpèkaatù bwalu bàdi ne cyà kwenza mpèkaatù. Aci's ndwìdi lùdi lwènza luse wèwè wamba ne wèwè "udi ne cyà kwenza mpèkaatù." Kàdi pàdi ufika ku dyumvwa ne kabyèna bikèngela bwà wèwè kwenza kàbìdi mpèkaatù to! Kùdi ànu bantu

bàdi bàjuuka kuulu bèèla milawu ne bàseka bàkondwela, ne—ne bàkubùikila mùdi “cidingidingi” ne bikwàbò byònsò, mbangènzàmpèkààtù bàà ku bukolè. Nwamònu’s, dībà adi kakwèna ditèkemena bwàbò nànsha. Kàdi muntu awu udi wenza cintu kampànda dībà dyònsò, pèndè kî mmuswè kucyènza to. Yèyè—yèyè ùdi wiba, kî mmuswè kwiba to. Ne ùdi ùshima, kàdi kî mmuswè kushima to. Ùdi—ùdi wènza bintu kampànda bidìye—bidìye kàyì muswè kwenza to, kî mmuswè kwikala ngènzàmpèkààtù to. Kùdi ditèkemena bwèndè yèyè bu wèwè mwà kumuleeja cìdì Bulelèlà. Nwamònu anyi? Lwàkù ku mulayi wà Nzambi ne tèèkapù diitabuuja dyèbè, ne pàtukà ùkakungàmàngànè ne mwena lukunà. Kènà mwà kushààla mucilamè ntàntà mule to, kwàjìkì, bwalu ncyèbè.

⁶⁶ Mpindyewu, tütàngilàayi muntu ewu mpindyewu. Ki Abraham ewu wàmba apa ne: “Ndi mupyànyi. Eci ncyànyi, cintu cyònsò mu buloba ebu ncyànyi. Bwalu Nzambi. . . Nciwva mwànji kucìpeta to.” Kàdi ùwva naaci, cìwva cyèndè, nànsha nànkù.

⁶⁷ Mpindyewu tudi bapyànyi bàà bintu byònsò. Ncyà bushùwà anyi? Tudi bapyànyi bàà bintu byònsò. Bible ngwafùmù ku dyamba nànkù. Twètù tudi bapyànyi bàà bintu byònsò, cintu ne cintu. Katwènà bânji kubikòokeshà to, kàdi’s mbyètù. Amen. Kaa, butùmbi’s wè! Ncyènà nànsha ne centimètre wa buloba to, kàdi bwònsò mbwànyi, nànsha nànkù. Bushùwà. Bwònsò mbwètù, mbwà cisàmbà, Èkèleeziyà, beena kwitabuuja, Mukàji-musèla wa Kilistò ki mwènà katùpà ne katùpà kààbù kònsò. Russie ùdi ùkàlwangeena, États-Unis ùlwangana bwà kòkò *aku*, ne ewu ùlwangana bwà *aka* ne *ewu* udi kwàka ne kashààdi, nènku pashìshe bàdi bàtùbiikila twètù ne “babùlùke.” Sòmbaayi ànu hòlàà, mbwènù nwènù, nànsha nànkù. Amen. Bònsò nebùshààle bumpyànyi bwètù, nànsha nànkù, nènku bàlekèlaayi bakòkanganè ne batàndanganè muntu ne mukwèndè. Mbwètù twètù. Twètù ki bàdi bàbùpeta. Bòbò kî mbafwànyine nànsha kukwèlela meeji to, kàdi twètù tudi tukwèlela meeji, nànsha nànkù. Kwelèlaayi meeji, mu mìshindù yònsò’s!

⁶⁸ Nganyi uvwa mwà kwikala mwelè meeji bwà muntu mununu mukèsè mukwàte ne byà luse awu, ngombe yà kale ayi minyànè mishààle ànu mifùbà ku lusongo lwà kakùnà aku, ne ùwva mwenabì byònsò? Pàlèstine yònsò awu ùwva wèndè yèyè. Èyowà’s, mukalenge. Pa nànkù pààkafikàye mu cikondo cyà kutembangana kwà makàndà, Nzambi wàkajaadika ne ùwva nendè. Wàkangata dyanza dikesè dyà bantu adi e kuyayè kuntwaku ne kushebeyayè yònsò wa kùdìbo, kî kwalujaye cintu cyèndè. Amen. Ndi muswè aci. Bwà cinyi? Wàkatèèka diitabuuja dyèndè pa Lubwebwe lwà mulayi wà Nzambi. Ki cìdì cikèngediibwa ncyòci aci. Kàkaasa cishimikidi cikwàbò to, kuya kashààla wa mu bulongolodi kampànda anyi kupeta cintu

kampànda cyà mùshindù ewu. Wàkatèeka diitabuuja dyèndè pa Mulayi awu! Amen. Ki cyôci aci, pa Mulayi awu, ne ki yêyè awu wènda ùya mutàngile kumpàla! Mwelè wà mvità mukwàte dimòmà anyi kawùyi mukwàte dimòmà, aci kacivwa ne civwàci cishintulula bwèndè yêyè to, ùvwa ne diitabuuja dyèndè diteèka pa Mulayi.

⁶⁹ Nènku dîbà dyûdi ulwa kumpàla eku bwà kukusambidilabò, pawikala dijinga ne lupàndu, pawikalà dijinga ne dyondopa dyà kwà Nzambi, nànsha ciikàle cinyi, wêwè mwikàle mwena kwitabuuja, udi mupyanyi wa mulayi wónsò. Pa nàнку tèeka diitabuuja dyèbè pa mulayi ne ùtunganuke ne kuya kampàla, ne wàmbila Sàtaanà ne: “Cyalùjè! Cyalùjè! Ncyanyi.” Kùmulekèdi ùkushima to. Imànà wêwè ànu mwaba awu mu njila, neàkwalùjiléci. Nzambi mmwambe ne yêyè ùvwa mwà kucyenza, nàнку ùdi ne cyà kucyenza. Ki bukòokeshi bwèbè mbwàbù. Ncyà bushùwà, mupyanyi wa bintu byónsò!

⁷⁰ Wàkashàala pa cishimikidi aci, Dîyi dilaya, ne ùvwa ne mupyanyi. Yêyè nguvwa mupyanyi, nàнку yêyè ùvwa mucimanyè. Mbîmpè, mukalenge, paanyimà pàà mulayi mumanè kwikala mumushindikila, ki kwenzayè bwobùmwe dîbà adi ne Mulayanganyi (ndi muswè aci be) paanyimà pàà Nzambi mumanè kwenza mulayi. Nènku dîbà adi, nwamònu’s, Abraham kacya kàvwa mwânji kupeta diteeta kumpàla nànsha, nàнку ki yêyè... dyà mùshindù awu. Pa nàнку kumanyayè ne byónsò bivwa byèndè, ne cyôci aci civwa mulayi, pèndè kacya kàvwakù mwânji kulwangana ne cilwilu nànsha. Kàvwa mumanyè kantu nànsha kàmwe pa bwalu abu to. Kàvwa—kàvwa muntu mulongesha bwà kulwangana mvità to. Abraham kàvwa mulwanganyi wa mvità to, ùvwa cidimè. Ne Abraham kàvwa mwà kwenza cintu nànsha cimwè to, bwalu yêyè—yêyè kàvwa mùsàlaayi to. Bantu bèndè kabàvwa bàsàlaayi to, bàvwa baabidimè. Pa nàнку cintu cimwèpèlè civwàye mufwànyine kwenza civwa ànu kwangata mulayi wà Nzambi, kutèeka diitabuuja dyèndè pa mulayi ne kupàtuka, kuya wènda ùlondangana naawù. Pashiishe pààkamòna Abraham cyôci aci, ne kupeta mulayi awu, ne kujandula ne Nzambi wàkamushindikilawù, ne Yêyè ùdi ùshàala mukwàte ku mulayi Wèndè... Amen! Ki cyôci aci.

⁷¹ Pawikalà kacya kùyikù mwânji kupeta Nyumà Mwîmpè to, kùyi mumanyè kantu nànsha kàmwe pa Cyôci aci to, kàdi cintu kampànda mu mwoyi wèbè ciikale cikwambila ne udi Nèndè dijinga, wêwè shàala ànu mwaba awu. Ki Mwoyi wà Cyèndèlèèlè ngwòwò awu, ki cyûdi mupyanyi wàci ncyôci aci. Shàala ànu mwaba awu, ne ùtàngile Sàtaanà mumpàla wamba ne: “Udi mwîmvi, s’ngwèwè! Ndi mwîye bwà kukòokesha bintu byàkafwilà Yesù Kilstò bwà mémè kwikala naabi abi, mpindyewu byalùjaaku! Nkàtùkilè mu njila wànyì!”

⁷² Pashiishe, katanci aka anyi, Nyumà Mwîmpè neàpòngolokè

pambidi pèèbè. Dìbà adi cintu kampànda cidi cyènzeka. Cintu kampànda necyènzekè. Ncinyi ciinè aci? Nzambì mmushindike ne Udi ùkùmbaja Dìyì Dyèndè. Aci's cidi ànu mu cyôci menemene. Dìbà adi, nwamònu's, pashiishe paanyimà pàà wèwè mumanè kumòna ne Dìyì ndikushindikila, bwà ne wèwè udi musùngìdìibwe, udi ne Nyumà Mwímpè, dìbà adi ncinyi? Abraham ùvwa muPETÈ buCìmunyi, ki yèyè ulwàlwa wàlukila ewu; ùvwa ùpweka ne njila, ne diitabuuja dyèndè diimanyikila pa Dìyì dyà ne ùvwa mwà kucyàluja, cìvwaye mujìmje aci, ki yèyè udi walukila naaci ewu, wènda lwendu lwà buCìmunyi. Ki cintu cìmwècìmwè aci cyùdi mwà kwenza. Wèwè kùyi ne Mwoyi wa Cyendèlèlè to, lòmbe Nzambì. Tonda mpèkaatù yèbè, itàbùùjà Mwànà wa Nzambì, itàbà dibàtiiza dyà Nyumà Mwímpè, wàmbè ne: "Nzambì, ndi mulwe bwà Cyôci aci, ndi kaaba aka bwà kuCyàkidila." Pashiishe udi walukila, lwendu lwà buCìmunyi. Udi naaCì. Amen. Ukenka ànu kukenka, ekèlekèle, nyuunyi yimba mùshindù mushiilàngàne, ne muntu yònsò. . . Nudi banangàngàne ne muntu yònsò dìbà adi. Lukinù lwà kale alu, budimù, difwilàkana mbimanè kuumuka. Munangè muntu yònsò! Kaa, udi ànu munkaci mwà kucyònkomoka, wimba misambu, wela mbilà, utùmbisha Nzambì. Kùcyùki bidì ní nganyi yònsò ewu wàmba bwèbè wèwè to. Mbímpè. Ncyà bushùwà, mu lwendu lwà buCìmunyi!

⁷³ Pashiishe Nganyi wakalwa kutuutakeena nendè? Nganyi wakalwa kutuutakeena nendè? Melekisedekè. Melekisedekè wàkapàtuka bwà kutwilangana nendè paanyimà pàà yèyè mumanè kupeta Dìyì dyèndè dishindika. Melekisedekè ki Yèyè wàkamupèèsha Dìyì. Pashiishe kutèekaye dyèndè Dì- . . .diitabuuja dyèndè pa Dìyì, kupetayè buCìmunyi e kwalukilayè, dìbà adi wàkenza bwobùmwè. Amen. Mpindyewu, nenùbwenzè, pèènù. Kaa, Dìyì Dyèndè nedilwe cintu kampànda cyà cipyaci pyà kùdì, dìbà dyònsò dyùdi upeta dibàtiiza dyà Nyumà Mwímpè adi. Kaa, ekèlekèle!

⁷⁴ Kaa, wèwè udi wamba ne: "Ncyèna mwà kumòna bintu ebi to. Ncyèna ngiitabuuja dyela dyà mbilà to. Ncyèna ngiitabuuja dyakula dyà mu myakulu to. Ncyèna ngiitabuuja dyondopa dyà kùdì Nzambì to." Bidi bileeja ànu ne kacya kùtukù mwanji kupeta buCìmunyi to. Ncyà bushùwà. Kàdi musangu wùmwèpelè ùdi upeta buCìmunyi, dìbà adi udi mubùpetè. Dìbà adi udi naabu. Èyowà's, mukalenge, dìbà adi udi mwà kwela mbilà. Mèmè. . .

⁷⁵ Nuvwa bamòne musangu kampànda mvwa ne ciibidilu cyà kwela meeji ne dijà dyà maja mu Nyumà, kumòna muntu kampànda wimana ùja maja mu Nyumà. Mpindyewu, nkààdikù mumòne cyà citentula, kàdi nkààdikù mumòne, cintu cilelèlè, pààci. Pa nàнку, mèmè kulwa kujandula ne, mbwà cinyi bantu bàvwa mwà kujà maja mu Nyumà? Èè, kacya ncitu mwànji kumòna umwe ùpàtuka mu njila nànsha, ncitu mwànji kumòna

muntu wènta maalu à busenji nànsha. Mémè—mémè ntu mmòna ne bitu misangu yònsò ànu mu kalolo ne mu bulongàme ne mu bupòle, nènku nànsha bangènzàmpèkààtù bàdi banyeemena ku cyoshelu ne bàsùngidiibwa pàdìbi munkaci mwà kwenzeka apu. Èè, mwana ndikonka ne mbwà cinyi bìvwa nànkù, ki mémè kufika ku dijandula ne mbucimunyi.

⁷⁶ Davidi wàkajà maja kumpàla kwà Mukalenge, dîbà dyàkalujiibwà Mushèètè pa mwaba Wàwù wà ciikishilu. Amen. Pàkamònà Davidi Dîyì, bu mwàkadidi kale pa mèsà à mabwè, dyalùjidiibwa pa mwaba wàDì mujaalàme, Davidi wàkasànka ne kuja maja mu Nyumà, ùjeeta ùnyunguluka. Bwà cinyi? Wàkamòna Dîyì dyalùkile mu mwaba Wàdì. Amen.

⁷⁷ Cidi Dîyì dijinga, kacýèna cifùmìna mu sèminère kampànda, mu bintu kampànda byà tèlòlòjì bisopakaja to; kàdi kùdi muyiishi wa cyena-kale, mutùma kùdi Nzambi paanyimà pàà cyambilu, ne Dîyì, ùmòna Nzambi ùDishindika, cijaadiki.

⁷⁸ Dîbà adi Davidi wàkamba ne: “Butùmbi kùdi Nzambi, ki Cyòci eci!” Wènda ùnyunguluka wènda ùnyunguluka. Mukajèndè mukesè wa dyambu awu kujuuka mwaba awu, mwinè awu mwikale mwàna wa bakàjì wà mfùmù, e kwambayè ne: “Mòna’s, yèyè—yèyè—yèyè’s ùdi ùmfwisha bundù.”

⁷⁹ Ki Davidi kwambayè ne: “Kwèna mwanishe aci anyi? Tàngilààku eci’s!” Nènku wènda ùnyunguluka ki kukùtulayè kàbìdi. Èyowà! Kaa, ekèlekèle, ncikondo kaayi civwàye ùpicila’s wè!

⁸⁰ Nudi bamanyè’s, Nzambi wàkapwekesha mèsù mu Dyulu, kwamba ne: “Davidi, wèwè udi muntu wa pa mwoyi Wányi Sungasunga.” Nwamònu anyi? Nwamònu anyi? Bwà cinyi? Ùvwa mujimìje lutàmbishi lwònsò, ùvwa mujimìje byèndè byònsò. Wa bwalu awu ùvwa musele mwàna wa bakàjì wa mfùmù, kàdi aci kacivwa cibadiibwa ne musinga cikondo aci to. Ùvwa mumanyè ne ùvwa mumanyàngàne ne Mukòòkeshi wa Maulu ne buloba, nènku kî Dîyì dyà Nzambi edi dyènda dyàlukila munkaci mwàbò cyàkàbìdi, nènku Davidi ùvwa ne disànkà dyàbùngi be e kujàye maja. Yèyè wàkaja maja ne mwèndè mwònsò.

⁸¹ Milyàmà, wàkambula mutumbi e kupweka ne mwelelu wà màyi, wènda ùjila maja lukwàbò luseke alu. Paanyimà pàà yèyè mumanè kupicila mu Mbù Mukünze ne mumòne beena lukunà bèndè binyijìibwe mu màyi, dîbà adi ùvwa mwà kuja maja mu Nyumà. Pàakamònàye beena lukunà bàvwà bamukèngeshe, bafwè, dîbà adi kujàye maja mu Nyumà. Ncyà bushùwà. Mpindyewu, nwamònu’s, paanyimà! Paanyimà pàà mvità mimanè kucimunyiibwa, dîbà adi butùmbi bwà Nzambi bùdi bùtùluka.

⁸² Mpindyewu, tudi tusangana ne Yèyè wàkatwilangana nendè. Ne paanyimà pàà mulayi mumanè kushindikiibwa, ùvwa—ùvwa ne bwobùmwè. Melekisedekè wàkapàtuka bwà kubènesha

Abraham, ne Wākamba ne: “Abraham àbèneshiibwè, ne Nzambi wa Abraham àbèneshiibwè, Mukòòkeshi wa Maulu ne buloba.”

⁸³ Kaa, ekèlekèle, mùshindù mwinè wúndì munange aci’s, mulayi wà mwena kwitabuuja’s wè! Wèwè udi wamba ne: “Aci cidi neetù bwalu kaayi?” Bwà mwena kwitabuuja yònsò! Mulayi wa mwena kwitabuuja m’Mwoyi wà Cyendèlèlè. Mulayi wà mwena kwitabuuja wùdi Mwoyi, disànkà, ditalala, mwoyi mule, musànggeelu, lutùùlù, mamuma à Nyumà, dyondopa dyà kùdi Nzambi, ndi ne bintu bitwè ku dikumi ne bìbìdì bìndì mufunde mwaba ewu, biipacila ku nàнку, bìdì bumpyànyi bwènù. Mbyènù nwènù, kàdi kanwènà mwà kubipeta panùdi kanùyì babilwangèene mvità to. Mbyènù. Cintu cyònsò cidi cimwèka ne mèsù, cintu cyònsò cyà matùkù makesè cidi cimwèka ne mèsù eci, ncyànyi mèmè. Nzambi mmucimpèeshe, bwalu ku Kilistò nkùdiYe mucimpèele. Ne bintu bìdì kabiyi bimwèka ne mèsù mbyànyi. Amen. Ndi muswè aci! Cyùdì mwà kumòna, bu mùdi dyondopa dyà kùdi Nzambi, ne bikwàbò, mùshindù awu, aci’s ncimpè, tudi twanyisha cyòci aci; kàdi cidi kaciyi cimwèneka to!

⁸⁴ Mpindyewu, maalu à mamanya àdi mwà kukenketa lwà apa kwamba ne: “Èè, tùmonebi tǔng, ndekèlaayibi ngàngate muntu ewu. Nwǎmbi ne mmwondòpiibwè, ndekèlaayibi tǔng mmwangàtè mmwènzèbi mateeta. Ndekèlaayibi tǔng mmonè cidi cyenzèke. Muwǎmbi mwinè ne uvwa ne cyùjà cyà kànsère musangu kampànda anyi, mukalenge?”

“Èyowà, ànu *mwab’ewu*.”

⁸⁵ “Èè, lekèlaayibi ngènzè lukèbukebu lwà maalu à mamanya mmonè ní kí ncutùkine kàdi kaciyi cyumùke nànsha. Udi wamba ne kale wàwa uvwa mpofo kàdi mpindyewu ukàadi umòna. Ndi mmana bishi? Lekèlaayi ntàngile ntàngidilu wa maalu à mamanya bwà ncimòne.”

⁸⁶ Mpindyewu, bòbò bàvwa mwà kucikenketa, kàdi nànsha nàнку mèmè—mèmè ndi nàнку, pàanyi, mupyànyi waci, cintu cyònsò cyà mubidi ewu. Ne pashùishe ndi kàbìdì mupyànyi wa bintu bìdì kabiyi mwà kumwèka, mwaba ùdi maalu à mamanya kàyi mwà kukenketa nànsha. Amen. Amen. Bintu bìdì kabiyi bimwèka, amen, mèmè ndi mupyànyi wa byòbi abi. Èyowà’s, mukalenge. Bintu bìdì mwà kumwèka ne mèsù, ndi mupyànyi wabi. Buloba bwà mpindyewu ebu, ndi mpyànyi, wèwè udi mupyànyi. Mwena kwitabuuja yònsò mmupyànyi, mmupyànyi waci. Mwòmò, díbà adi cidi kaciyi cimwèka ne mèsù! Mukòòkeshi wa cinyi? Maulu ne buloba. Amen. Bintu byònsò! Nudi nwitabuuja aci anyi?

⁸⁷ Wèwè udi wamba ne: “Mwanèètù Branham, kàdi bishi bwà pambèlu pàapa paùdi kùyì mwà kumòna? Mmunyi mùdi mumanyè’s?” Cìcìdì ànu cyànyi mèmè. Ncyà bushùwà. Dyulu didi dyànyi mèmè. Disànkà ndyànyi, Nzambi ngudi mwambè

nànkù. Nènku ncyà bushùwà. “Èè, wèwè kacya kùtu mwánjì kumòna to, mmunyi mùdì mumanyè ne didiku?” Ndi mumanyè ne didiku, mu mishindù yònsò, Nzambì ngudi mwàmbè nànkù awu. “Mmunyi mùdì umanya ne udi mupyànyi waci, paùdì kacya kùyi mucimòne?” Mèmè ndi ngiitabuuja Dìyi Dyèndè. Amen. Nwamònu anyi? Mèmè ndi mupyànyi, wèwè udi mupyànyi pàmwè naanyi, tudi bapyànyi pàmwè ne Kilistò Yesù.

⁸⁸ Nukààvwakù bamòne mwaba ewu mu Kolintò emu, mu Kolintò Mwibidì, Pòlò mmwambe, nànsha lufù mene, tudi tukòokesha lufù. Elàayi meeji pa bwalu ebu. Kukòokesha lufù? Èyowà, mukalenge, lùdi lùtuumvwila. Amen. Èè, butùmbi’s wè! Ngápù mwoyi ditaayika dyà cingoma adi mpindyewu, nwamònu’s. Bwà cinyi kàvwa munshipe? Bwalu kàvwa mwà kunshipa to. Mbwà bwalu abu. Dìbà kadìvwa dyakàne bwà Nzambì to. Úvwa mwà kulwa mwònsò mùvwàYe muswè amu, kàdi kènà mwà kukwangata to. Amen. Butùmbi’s wè! Ndi mufutè dibànzà dyànyi kùkaadi ntàntà mule pàmvwà mwitàbuuje Yesù Kilistò Udi ne mwoyi kashidi ne kashidi. Mpindyewu lufù lùdi lutèeleja bitùdì twamba. Amen.

Wèwè udi wamba ne: “Mukòokeshi wa lufù anyi?”

⁸⁹ Kì cyàkambà Pòlò mwab’ewu mu Kolintò emu. Lufù, mene, tudi tulukòokesha. Mòna’s, piinè apu’s mpàvwàbo bàdìlongolola bwà kumukòsabò mutù, kwambayè ne: “Kaa, lufù, kalonda kèèbè kàdi penyi? Kalonda kèèbè kàdi penyi? Ndeejàaku mwaba wùdi mwà kunkwàcishila bwòwà.”

⁹⁰ Lufù kwambalù ne: “Nènkufinyìnè panshì kàdi kukwela mu lukità, nènku neùbole ùvingutukè.”

⁹¹ Yèyè ne: “Kàdi, kaa, twasàkidila kùdi Nzambì,” [Katùpà kàà mukàbà wa mèyi munda mutupù—Muf.] “Udi mutupèeshè bucimunyi ku Mukalenge wetù Yesù Kilistò.” Èyowà’s, mukalenge. Lufù, ifèrnò, ne lukità, ndi mbikòokesha byònsò, bwalu Yèyè wàkatùcimwinabi byònsò. Mukòokeshi!

⁹² Ànu bu mwàkatwàlà Yoshùwà ne Kaalèbà cishindikì cyà buloba bùvwà kabùyì bùmweneka ne mèsù abu bùvwà buffdiibwe kùdì cisàmbà ku mulayi. Yoshùwà ne Kaalèbà kutwàlabò cishindikì cyà ne kùvwa buloba bwà mùshindù awu. Mpindyewu, kwìnshì eku bàvwa ne mulayi wà bwòbò abu. Nzambì kubàpèeshayè mulayi, nènku bóbò kubàndabò too ne mu buloba abu, kàdi kacya kabàvwakù bânji kubùmòna nànsha, nènku Yoshùwà ne Kaalèbà kubwelabò mu buloba bulaya ne kutwàlabò cishindikì cyà ne buloba bùvwaku ne bùvwà mmwaba mwímpè, mùvwà mabèèlè ne bwíci bituuta nkòkà. Amen! Cìvwa ncinyi? Bàvwa ne cyà kukòokesha buloba abu. Bàvwa ne mulayi. Bàvwa biikile mu njila batàngilemù, nènku bàkaavwa pabwìpì menemene ne Yadènè, nènku Yoshùwà wàkasabuka dyàmàmwà ne kutwàlayè bishindikì byà ne bùvwà buloba bwímpè.

⁹³ Ànu cyàkenzà Yoshùwà bwà bânà bàà Izàlèlèlà aci (*Yoshùwà* mbwena kwamba ne “Musùngidi,” mwákù Yoshùwà awu’s), nènku ncintu cimwècimwè cyàkenzà Yesù bwà Èkèleeziya díbà dyàkaMushipàbo. Wàkacimuna lufù. Wàkacimuna ifernò. Wàkacimuna lukità. Ne Wàkabiika kàbìdì ku lufù ne cileeji, dibàtiiza dyà Nyumà Mwímpè, cyà ne kùdì Buloba dyàmwàmwa dyà musùlu, bùdìbo bàbìkila ne mbulenga bwà kashidi. Amen. Wàkalukila ne kutùtwàdila cishindiki. Ncinyi cidiCi cyènzà, Mwanèètù Branham? Cidi cyènzà ne wimanyikè dishima, diiba, dinwà dyà maalà, dicipangana, masandi, cintu cyònsò. Cidi cikuvwiya cifùkìbwà cipyacipyà. Mémè uvwa musangu kampànda mufwè mu mpèkaatù ne matomboka, nànsha nàнку ndi ne mwoyi, kí mmémè to kàdì Kilistò ngudi ne mwoyi munda mwànyì. Mémè ndi cifùkìbwà cipyacipyà mu Kilistò Yesù, amen, mupyànyì wa mulayì. Àlèluuyàh! Èyowà’s, mukalenge. Buloba abu mbwètù twètù. Nudi bacimanyè munyì? Yoshùwà wàkabiika ku bafwè, wàkatwàla cishindiki, Nyumà Mwímpè. Mémè ndi Nendè. Amen. Yoyòyò! Butùmbì’s wè! Mémè ndi mupyànyì. Kaa, mwànà wa Mfùmù, mwànà wa Mfùmù, mupyànyì wa bintu byònsò! Bible ngudi mwambè nàнку. Nzambì umweumwe—Nzambì umweumwe wakapèèsha Izàlèlèlà mulayì wà buloba bulaya awu (civwa cintu civwà kaciyi cimwèka ne mèsù kùdìbo), Bible umweumwe awu, Nzambì umweumwe awu ngudi mutùpèèshe mulayì wa Mwoyi wà Cyendèlèlèlè awu, ne Nyumà Mwímpè ùdi ucifidila bujaadiki. Kilistò ùdi ne mwoyi, kí mmufwè to. Ùdi ne mwoyi ànu munkaci mwètù emu, ùdi ne mwoyi munda mwètù, ku twètù eku, ùkwàta mudimu mu nyùngùlukilu wetù. Amen.

⁹⁴ Ùvwa n’Yèyè uvwa musòmbe pa cibàsa aci kuntu kwàka ditùkù adi díbà dìpetèlè Sàtaanà mpùngà wa kunshipa, kàdì kàvwa mwà kucyènzà to. Amen. Ne yèyè kàadyàkucyènzakù to too ne pàdì Kilistò wàmba ne cyakùmbànyì. Amen. Nànsha yèyè mulwè misangu bùngì kaayi, yèyè nealukile byanza bitupù pàdì Kilistò kàyì mutùme díyì. Amen. Mulayì, Nzambì ngudi mucilayè. N’Dìyì dyà Nzambì dídì dicilaya, ne twètù tudi tucìitabuuja bwalu tudi bapyànyì.

⁹⁵ Mémè ndi mupyànyì wa dyondopa dyà kùdì Nzambì. Ndi mupyànyì wa disànkà, ndi ne bukenji bwà kwikala ne disànkà. “Pa nàнку ncinyi cidi citàmba kukwenza disànkà nùнку?” Ndi ne bukenji bwà kwikala naadi. “Udi umanya bishi?” Bwalu ndi mupyànyì wadì. Amen! Yoyòyò! Mpindyewu ndi ndyùm vwa mutèndeleeedi wa menemene. Èyowà. Ndi mupyànyì wa disànkà. Ndi mupyànyì wa disànkà. Mémè ndi mupyànyì wa ditalala. Ndi mupyànyì wa Mwoyi wà Cyendèlèlèlè. Ndi mupyànyì wa Nyumà Mwímpè. Amen. Mémè ndi mupyànyì wa cileeji ne cileeji cyònsò Cidiku. Amen. Mémè ndi mupyànyì wa bukòokeshi bwà Nzambì. Amen. “Nganyì udi mukwenzè nàнку?” Kí mmémè to; Yèyè ngudi mwènze. Yònsò wa kunùdi mmupyànyì wa cintu

cimwècimwè aci.

⁹⁶ Mupyànyi wa nkwaswa wa butùmbì! “Ewu wacimuna neàsombè Naanyi pa Nkwasa Wanyi wa butùmbì, bu mûNdi mucimûne ne musòmbe pa Nkwasa wa butùmbì wa Taatù Wanyi.” Amen, mupyànyi wa bintu byònsò! Kí ng’anu cintu cimwè to; bintu byònsò! Byònsò bìdi mwinshi mwà makàsà èbè. Nànsha lufù lùdi mwinshi mwà makàsà èbè, lukità lùdi mwinshi mwà makàsà èbè, ifernò ùdi mwinshi mwà makàsà èbè, mpèkaatù ùdi mwinshi mwà makàsà èbè, byònsò bìdi mwinshi mwà makàsà èbè. Wèwè udi mupyànyi’s! Wèwè udi . . . Udi mufwè, ne mwoyi wèbè mmusokoka mu Nzambi ku Yesù Kilistò, ne wèwè udi mubiike ku lufù kabìdi bwà Mwoyi wa Cyendèlèlèlè, ne musòmbe mu myaba yà mu Dyulu mu Kilistò Yesù. Kaa, ekèlekèlè! Yoyòyò! Tùbìikilaayi cintu kanà cyònsò cinùdi baswè kutùbìikila aci, tùbìikilaayi cinùdi baswè kutùbìikilaa aci, nwámbe ne tudi bapàle panwikalà baswè, kàdi tudi bapyànyi. Bapyànyi bàà cinyi? Bintu byònsò.

⁹⁷ “Wèwè udi mupyànyi wa Branham Tabernacle anyi?” To, ndi mupyànyi wa bintu byònsò. Ni bìdi bimwèka, bìdiku, bìcilwalwà, wa bintu byònsò, ndi mupyànyi wabì.

⁹⁸ Nènku mpèekaatù yònsò ne cikisu byàkatèèkiibwa mwinshi mwà makàsà àanyi, ku ngàsà wa Yesù Kilistò. Wàkabìika mu dindà dyà Paasàkà, wàkacimuna lufù, ifernò ne lukità, e kungenzayè mupyànyi, ne kwambayè ne: “Indilà dyàmwàmwa ne Nènkupèeshè mulayi.” Ki musadidi Wendè mwela maanyi wa bukòokeshi awu kwamba ne: “Mulayi wùdi kunùdi ne kùdi bânà bèènù balela, kùdi aba bàdi kule, bungi bònsò mene bwàbìikilà Mukalenge Nzambi wetù abu.” Mèmè ndi mupyànyi. Amen. Amen. Yesù wàkatùjaadikilaci, ku dibìikà Dyèndè dyà ku lufù. Kaa, ekèlekèlè.

⁹⁹ Patùdi babwelè mu cyalu cyà mvità aci pankaci pàà lufù ne Mwoyi! “Mèmè ndi ngènzàmpèkàatù, Mwanèètù Branham.” Kabyèna bikèngela bwà wèwè kwikala ngènzàmpèkàatù to. Wèwè udi ngènzàmpèkàatù bwalu udi ujinga bwà kwikala ngènzàmpèkàatù. Kabyèna bikèngela bwà wèwè kwikala ngènzàmpèkàatù to. Dibànza dikaadi dimana kufuta.

¹⁰⁰ “Mwanèètù Branham, ndi njinga bwà ngìkalakù ne disànkà.” Udi mwà kudipeta. Wèwè udi ulekela cyanàànà Sàtaanà ùkwiba dyàkalengèlè dyàkafwilà Kilistò adi. Mèmè ndi mupyànyi wadi. Byònsò mbyànyi. Cintu cyònsò cyàkafwilàYe, ncyànyi mèmè, ncyèbè wèwè. Tudi bânà Bèndè, tudi bapyànyi bàaci, cintu cyònsò cyàkafwilàYe aci.

¹⁰¹ Mpindyewu, paùdi ubwela mu cyalu cyà mvità aci ne: “Kaa, kakwènakù cintu pàaci ne dibàtiiza dyà Nyumà Mwimpè to. Udi mumanyè’s, udi—udi—udi ukenza maalu à lukutukutu. Nènku nekwikalè cintu kampànda, nekwikalè cintu kampànda cishiilàngane.” Ncyèna ncyuka dishiilàngana dyaci to, ndi

mupyànyi waaci. Ciinè aci's ke Mwoyi, ne ndi ngènda Ngùlonda. Aci's ncilelèlà.

¹⁰² Ki civwà cikèngelà kwikala cisàka ngènzàmpèkààtù yònsò ncyôci aci. “Mémè ndi ndwa bwà kuCyàkidila pa cishimikidi cyà Nyumà Mwîmpè udi mwab'ewu mpindyewu ne ùngambila bwà kulwa ne kuCyàkidila. Ncyànyi. Ncyàkujuuka pàndi nciyi muCîpete to. Ncyênà muswè kwikala mukoleshi wa maalu to. Nênshaalè ànu mwab'ewu, ncyênà ncyùka cyònsò cìdi mwà kwenzeka nànsha. Ncyàdyàkulekelaku kusambila to too ne paWàmpèèsha Nyumà Mwîmpè, Mukalenge, ne ndi mumanyè ne Wèwè nèucyènzè mpindyewu mene. Kwòkò kwikàle cintu kampànda cibi mu lwendu lwànyi, ùcìngambile ne mémè nencyenzè. Ní nciyi aci, Mukalenge, nenye kacìlongolola.”

¹⁰³ Nzambi Yèyè kàyì ùbuulula cintu nànsha cìmwè to, wàmba ne: “Dìbà adi, Sàtaanà, ndi nCìvwila. Kwènà mwà kwimana mwaba awu ntàntà mule to, kàtukà mu njila wanyi!”

¹⁰⁴ Ki bwalu mbwòbù abu's, mupyànyi wa bintu byònsò. Mupyànyi wa Mwoyi wà Cyendèlèlè. Mupyànyi wa dyondopa dyà kùdi Nzambi.

Kaa, mupyànyi wa lupàndu, lumpetela kùdi
Nzambi,

Mulela ku Nyumà Wendè, musukula mu Mashi
Èndè.

Ebu ke bwànyi bwalu-bulonda, ewu ke
musambu wànyi,
Ntùmbisha Musùngidi wanyi mu bule bwà
ditùkù dijimà.

Dikòokela dipwàngàne, byònsò mbiikishe,
Mémè mu Musùngidi wanyi ndi ne disànkà ne
mubènèshìibwe;

Ntábala ne ngìndila, ne mutàngile muulu,
Mùle tètè ne bwîmpè ne dinanga Byèndè.

Àlèluuyàh! Ki bwalu mbwòbù abu's. Eci ke bwalu bwànyi bulonda, ne eci ke musambu wànyi. Mémè ndi mupyànyi wa lupàndu. Lupàndu nciyi? Cintu kampànda cìdi cikupèèbwa. Ndipà. Ndi mupyànyi wa lupàndù. Wa mùshindù kaayi? Bwà Mwoyi wà Cyendèlèlè. Lupàndù bwà musùkà wanyi, lupàndu bwà mubidi wànyi, lupàndu bwà dicyòkà dyànyi, lupàndu bwà cintu cyònsò. Nzambi wàkangenza mupyànyi wa bintu byònsò ku Kilistò, ne Wàkafwà, kubiika, ne kwalukila ne kutwàla cijaadiki, e kutùpòngolwelaCì. Kaa, ekèlekèle! Butùmbi's wè! Kaa, ekèlekèle!

¹⁰⁵ Mpindyewu, bànda kuntu kwàka, udi wenza cinyi? Paùdi uya ànu mwàkayà Abraham amu, bànda kuntu kwàka ne mulayi awu. “Nzambi, Wèwè ngudi mungambile ne ndwànyi mémè. Ndi ne diitabuuja mu mulayi Wèbè. Ndi ntwala Diyì Dyèbè. Wèwè ngwàkalaya cyòci eci. Wàkamba ne: ‘Lòmba, neùpete. Kèba,

neùsangane. Lòmba, nebàkupe. Kookòlà, nebùnzùlule.’ Ki mèmè ewu, Mukalenge. Mmèmè ewu. Ndi nkookola, nkèba, ndòmba. Ndi ne cyàkuCìpeta.” Ki bwalu mbwòbù abu’s. Dìbà adi cintu kampàndà cidi cyènzeka, kaa, paùdi utèeka Dìyì adi panshì apu.

¹⁰⁶ Tàngilàayi cyàkenzà Sàtaanà dìbà divwà Yesù mumwadìjìe Dìyì. “Ne Bàakafùnda kàbìdi...” Kutupika kuya kule ne Nshinga awu, mungàmbi dilòlò adi. Èyowà’s, mukalenge. Pashìishe ncinyi, paanyimà pàà wèwè mumanè kucimuna? Mmunyì mene mùdi ucimuna? Udikù mwà kudyènzela aci mu wèwè nkààyebe ànyì? To. Kùdi muntu kampànda wakakudyànjidila ne kukucimwina. Mwinè awu n’Kilistò. Mèmè ndi ànu mupyànyì waci. Kabyèna bikèngela bwà mèmè kwenza cintu nànsha cimwè to. Mèmè ndi mupyànyì wa mulayi. Cintu cimwèpelè cidi cikèngela bwà mèmè kwikala naaci, nkutèeka diitabuuja dyànyì pa mulayi Wèndè. Nudi nucimòna anyì?

¹⁰⁷ “Mwanèètù Branham, udi mukùmbànyine cyòci aci anyì?” To. “Udi wela meeji ne ndi mukùmbànyine anyì?” To. “Nudi nwela meeji ne Mwèpiskòpò mmukùmbànyine anyì?” To. “Kùdikù muntu mukùmbànyine anyì?” To. “Èè, bwà cinyì?” Wèwè udi mupyànyì.

¹⁰⁸ Pawikalà uvwa kanwàyì munène pa buloba apa, kàdi tatwèbè kukushiila mùliyò wa ndola, nànsha wèwè mukùmbànyine anyi to, wèndè—wèndè—wèndè mupyànyì, wèwè udi mupyànyì wa bumpyànyì bwà tatwèbè. Cyònsò cidìye mukushiile aci, ncyèbè wèwè nànsha wèwè mucikùmbànyine anyi to. Mmukushiileci. Amen.

¹⁰⁹ Mvwa ngènzàmpèekaatù, kàdi ndi mupyànyì. Ncìvwa mwimpè to, too ne mpindyewu, kàdi nànsha nàнку ndi ànu mupyànyì. Bìvwa bikèngela bwà mèmè kufwà ne kuya mu ifernò, kàdi’s ndi mupyànyì. Mèmè ndi mupyànyì wa cinyì? Mwoyi wa Cyèndèlèèlè. “Mmunyì mùdi mumanyè ne neùWùpete?” Mvwa muWuumvwe. Nyumà Mwimpè ngudi mulwè naaWù. Yesù wàkabiika ku bafwè bwà Wàmòna mwà kulwa. Ne mpindyewu mMulwè, ne Ùdi ùfila bujaadiki ne ùshìndika menemene cìvwàYe mwàmbè ne Neénzè. Nkàadi muumùke ku lufù muyè ku Mwoyi. Nkàadi mulwè, cìfùkùibwà cipyacìpyà mu Kilistò Yesù. Dìbà adi ndi mupyànyì. Èyowà’s, mukalenge. Mpindyewu ndi mwikila mu njila. Amen. Bintu mbimana kushipa. Bintu byònsò byà lwonji bìmvwà mwenze bìdi cinyì? Ànu bu mwàkenzà Milyàmà amu. Tàngilàayi paanyimà pààpa, ki byòbì abi, bifwè, bijiikiibwe mu mbù wa cipwàmwòyì, mu Mukàndà wà Mukàndà wà Nzambì wà mu Dyulu. Nkumanè kujika. Dìna dyànyì ndimana kufùnda mu Mukàndà awu, ne mumane kutwibwa cìtampì mwela mwinshi mwà mbù wa cipwàmwòyì, ne Mukàndà mupyàmùpyà, ne dìna dipyadìpyà difùnda mu Butùmbì amu. Nènku byòbì mbyànyì mèmè. Èyowà. Mpindyewu tudi bapyànyì bàà bintu byònsò, dìbà adi.

¹¹⁰ Pashiishe mbyenzè ànu bu díbà divwà Abraham, ncinyi cyàkamwambila Nzambi? “Buloba ebu mbwèbè. Cyònsò cidimu aci ncyèbè. Tàngilà ku esètè, ku nord, ku wesètè, ne ku sud, byònsò mbyèbè, bintu byònsò ebi. Ndi muswè bwà ùlwe kwenza lwendu mu buloba bwenyi, kàdi nenkuvwijè mupyànyi wa buloba abu. Nènkupèèshèbu, wèwè ne dimiinu dyèbè, paanyimà pèèbè wèwè bwà kashidi.” Mpindyewu, Abraham, cintu cimwèpelè civwàye ne cyà kwenza civwa ànu kutèeka diitabuuja pa mulayi awu, kwambula mwelè wèndè wà mvità ne kucimuna. Pààkafikà cikondo cyà bwalu kashondo, wàkapweka muntwamu ne Nzambi wàkamulwangeena mvità yèndè. Nènku pààkalwanganàye mvità, wàkashipa bamfùmù.

¹¹¹ Nènku ki yèyè udi walukila ewu, amen, byònsò bijike mpindyewu. Mwanèètù, ùvwa mwà kwela mbilà. Tèèlejàayi mùdi bansongalùmè bònsò bèèla mbilà bàtùmbisha Mukalenge! Ki Abraham ùlwàwa ewu, kàdi Nganyì wàkapàtuka bwà kutuutakeena nendè awu? Melekisedekè, Mfùmù wa Salèmà. Kàdi tàngilàayi nùmonè cyàkenzàbo aci. Paanyimà pàà mvità mimanè kujika, bàvwa mwà kusòmba ne kwangata dyàmpà ne mvinyò. Mfùmù wàkapàtula dyàmpà ne mvinyò. Bwà cinyi Wàkamwenzela nànkù? Paanyimà pàà mvità mimanè kujika, paanyimà pàà bamanè kupeta bucimunyi, díbà adi bàvwa mwà kusòmbela panshi ne kwangata mèèsà à Mukalenge pàmwè, kuyiikila ewu ne mukwèndè ne kudyà mèèsà à Mukalenge pàmwè. Kaa, ki cidi Nzambi muswè bwà bàna Bèndè kwenza dilòlò edi.

¹¹² “Dìbà adi kàdi bìshi bwèbè wèwè, Mwanèètù Branham? Kàdi bìshi bwà Èkèleeziyà ùdi wakula nendè awu?” Twètù tudi dimiinu dyà Abraham, bòbò ki Dimiinu dyà Bukalenge dyà Abraham. Twètù tudi dimiinu dyà Abraham, ku mulayi, ku Kilistò Yesù tudi tulwa dimiinu dyà Abraham ne tudi bapyànyi pàmwè nendè bilondèshile mulayi. Dìbà adi piikalàbi ne Abraham ùvwa mupyànyi, mémè ndi mupyànyi. Mémè ndi mupyànyi pàmwè ne Abraham, ne nànkù ke mùdi wèwè pèèbè. Kàdi cyàkalwa bìshi? Kupicila ku Dimiinu dyà Bukalenge dyà Abraham, divwà Kilistò Yesù, Mulayiibwè awu, ku diitabuuja. Abraham wàkapeta mwànà wa balume, bu ewu uvwa ufumina ku bafwè. Nènku twàkapeta Mwànà uvwa kàyì nànsha mwànà mwinè to, ne kakùyì mùshindù wà kufika mwab’ewu to, kàdi Nzambi wàkaMwenza ne wàkatùtùminaYe. Ne Yèyè wàkalwa ne wàkafuta cibawu cyà mpèkaatù yètù, ne ku lufù Lwèndè mémè kulwa mupyànyi. Kaa, ekèlekèle. Ki bwalu mbwòbù abu’s. Ne lwonji lwònsò lwà dyabùlù lùdi paanyimà. Butùmbi bwikalè kùdi Nzambi!

¹¹³ Kucimuna! Mbanganyi bàdi bacimùne, dilòlò edi? Tùmonèbi cyanza cyènù ne: “Ku ngàsà wa Nzambi ndi mucimùne.” Butùmbi bwikalè kùdi Nzambi. Nudi bamanye cindi ngèela meji ne bivwa bikèngela twètù kwenza mpindyewu

mene anyi? Ndi ànu mbanga mùshindù ewu ne munùlamè cyàbìbìdì cijimà cyà bufùku. Twenzàyikù ànu disangisha dikesè dyà didilàmbula, kulàmbula myoyi yètù cyàkàbìdì kùdì Nzambì. Mbanganyi bàdì bàdyùmvwa ne mbaswè kwenza nànkù? Kaa, ndi ne cipite pa cimwè mpindyewu, ndi ne byanza byànyì byònsò byela muulu, ne mwoyi wànyì, kàbìdì. Ndi muswè bwà mwoyi wànyì kwakulawù bwà Kilistò. Ndi muswè kudilàmbula cyàkàbìdì kùdì Kilistò. Ndi muswè bwà diswa Dyèndè dyenjìibwè, dyànyì diìkalè paanyimà, kàdì—kàdì Dyèndè diswa diìkalè dyenjìibwe. Ndi muswè bwà kwikala ne lwendu lwà bucimunyi. Kabìyì ne bwalu mmémè to; bwalu ndi mumanyè ne Èvànjeeliyò wàkayiiishaYè ùdì ùkènga leelù ewu bwà bwalu bwà bilèlè biswika byà cyena màngumba ne bintu bikwàbò byònsò ebi. Bucimunyi bunène butùvwà mwà kwikala naabù mbwaluja paanyimà kùdì mwena lukuna. Nzambì, ndekèlèku mpàtulè Mwelè wà mvità ewu, swàkù weelè nsesà ùkenkè, ne ùye mutàngile kumpàla. Swàkù bwà diswa dyànyì mèmè diìkalè paanyimà, ne Dìyì Dyèndè dyèndè diya ditàngile kumpàla mùshindù awu, Mwelè mutwè musàkisha nseke yìbìdì munkaci mwà kupenga njila.

¹¹⁴ Twimanyinàayi kuulu mpindyewu ne tùdilàmbùlè twètù biinè cyàkàbìdì. Muntu ne muntu mu wèbè mùshindù, dilàmbùlè nkàayebè kùdì Mukalenge. Twèlàayi byanza muulu mpindyewu kùdì Nzambì, muntu ne muntu.

¹¹⁵ Taatù wetù wa mu Dyulu, dilòlò edì tudì tudilàmbula Kùdì ne mwètù mwònsò mutùdì pèètù bamanyè amu. Tudi bamanyè ne tudì bapyànyì bàà bintu byònsò. Wèwè ngwàkacìlaya, Mukalenge Yèsù, ne tudì tucìitabuuja. Mpindyewu, twètù katwàkukùmbana bwà kucyènta pawikalà Wèwè Mukalenge, kùyì. . . ànu twètù biinè batèeke diitabuuja dyètù pa mulayi Wèbè. Mpindyewu, Wèwè wàkamba, mu Bible ne: “Ewu udi udyà Mubidi Wànyì ne ùnwa Mashi Àànyì ùdì ne Mwoyi wà kashidi, ne kàakupicila mu dipiila to, kàdì neàpicilè. . . wàmányì kuumuka ku lufù muyè ku Mwoyi. Ewu udi udyà Mubidi Wànyì ne ùnwa Mashi Àànyì ùdì ne Mwoyi wà Cyendèlèlèlè, ne Mèmè nèmubiishè ku ditùkù dyà ndekeelu.” Ke mulayi ngwòwò awu. Ki cyùdì Wèwè mwambè ncyòcì aci. Ki citùdì twitabuuja ncyòcì aci.

¹¹⁶ Nènku, Mukalenge Nzambì, Èyì Nyumà Mwìmpè, endà pambidi pèètù. Kaa, endà, Nzambì wa yààya! Endà, Èyì Mukalenge, munda mwètù. Nyumà wa Nzambì udi ne mwoyi, twakidilèku, Mukalenge. Mu Dìnà dyà Kilistò twakidilèku. Nkezùlèku, mfwìmbèku, ngenzèku, Èyì Nzambì, mu cimfwànyì cyà Mwànà wa Nzambì. Ngangàtèku, Mukalenge, mèmè ewu ndi Wèbè. Ndi nKupèèsha èkèleeziyà ewu. Ndi nKupèèsha musùukà wònsò ùdì kaaba aka, pàmwè ne wànyì, Mukalenge. Mpindyewu tufwìmbàku ne ùtùpe mbùngakeenù, swàkù tùpwe mwoyi njila yètù yà lwonji yà bungènzàmpèkàatù ayì, ne tùmányè ne patùdì

ànu tutèeka dyètù—dyètù diitabuuja, diitabuuja diinè ditùdi naadi adi, pa Dìyì Dyèbè dilaya, Wèwè neütwendèshè ku bucimunyi ne ku bucimunyi. Wàkacilaya.

¹¹⁷ Sàtaanà kèna mwà kutwenzela bibi to, Mukalenge. Ûvwa mwà kwenza cyònsò cidiye mwà kwenza aci, kàdi kèna mwà kutùlengakù to. Pawàkamulekelelà cikondo kampànda pambidi pàà Yobò, Wakamba ne: “Kwàngaci mwoyi wèndè to.” Yéyè wàkenza bintu byònsò kuumusha kuwàngata. Kàdi kàvwa mwà kucyènza to, bwalu mulayi Wèbè wùvwa ànu mwaba awu kùdi Yobò.

¹¹⁸ Nènku, Nzambi, Wèwè ucidi ànu Nzambi umweumwe awu leelù ewu. Wèwè udi ukùba Bèèbè Wèwè. Tudi bamanyè ne m’Bulelèlà, nènku tudi tudilàmbula cyàkàbìdi. Sukùlàku misùùkà yètù yà mpèkaatù, Mukalenge, patùdi tujikula diitabuuja dyètù apa. Nènku, Kilistò Yesù, twàkidilèku. Ne patùdi tutwàdija kwangata Didya dyà Mukalenge edi, Nzambi, yikilà nèètù mu myoyi yètù. Twambile mpindyewu mwaba utùdi bapiile. Tùleejè mwaba ùdi bubì bwètù, Mukalenge. Tudi tunyingalala ne didipwekesha bwà bwalu bwàyì. Ne didipwekesha dyònsò ndi ntèeka mpèkaatù yànyì pa cyoshelu, Mukalenge. Mémè mwinè ndi nditèeka mu didipwekesha dyònsò pa Dìyì Dyèbè, Mukalenge, ne ku luse Lwèbè.

¹¹⁹ Ki mémè ewu, Mukalenge, enzà naanyì m’Ùdi mumòne mukùmbàne. Alu’s ke lubilà lwà èkèleeziyà ewu, Mukalenge ne: “Enza neetù m’Ùdi mumòne mukùmbàne.” Ndi mwà kwakula ànu bwà bwànyì—bwà bwànyì mémè mwinè, Mukalenge, kàdi ndi ngiitabuuja ne mu myoyi yàbò bàdi biitabuuja cintu cimwècimwè aci. Enzà neetù m’Ùdi umòna mukùmbàne amu. Tudi twitabuuja. Tudi baswè kwikala bapyànyì, ne tudi bamanyè ne tudi bapyànyì ntàntà yònsò utùdi tushààla mu Kilistò Yesù. Tudi bapyànyì pàmwe Nendè kumpàlà kwà Nkwasa wa butùmbi.

¹²⁰ Mpindyewu ikàlàku neetù. Ondòpàku mabèèdi munkaci mwètù, Mukalenge. Kwòkò kwikàle mubidi ùdi ùsaama mwab’ewu dilòlò edi, wùlengeku, wondòpèku, wùsàngajeku. Enzàku nàнку, Mukalenge. Kwòkò kwikàle musùùkà ùsaama, swàkù wòndòpiibwè ànu mpindyewu. Swàkù bwà musùùkà ùdi mucibùlùkile panshi awu wòlolodiibwe. Swàkù bwà binù bidì bitekète abi bidì bilembèlèle ne byanza bidì bitekète abi bibàndishiiibwe mu butùmbi ne byelè mbilà kùdi Nzambi. Swàkù bwà njila mikònyàngàle yòlolodiibwe. Swàkù kwikale cibeeba mu cipèèlà bwà Nzambi wetù.

¹²¹ Mukalenge, tudi twitabuuja ne Udi ulwa kàtàtaakà, nènku lekèlaaku twambè Dìyì Dyèbè ne dìyì dikolè, Mukalenge, ne kuseba cibeeba mu cipèèlà, myaba mikònyàngàle kuyòlolola, bwà Mukalenge wetù. Tùtaayishèku muji wònsò wà cyena dngumba. Tùtaayishèku muji wònsò wà bululu, tùtaayishèku

budimù bwónsò, mucyàwùdì ne difwilakana, bwà ne Díyì dilelèlè dyà Nzambi dyàmòna mwà kutuuta nkòkà bu misùlu yà disànka. Enzàku nàнку, Taatù. Tudi tudifila twètù biinè Kùdì mpindyewu kumpàla menemene kwà twètù kwangata Didyà dyà Mukalenge edi. Mu Dìnà dyà Yesù Kilistò. Amen.

122 Pàcìdì. . . Mwanèètù wa bakàjì Spencer ùdì ùkèba disambila bwà mubidi wèndè. [Mwanèètù wa bakàjì Spencer ùdì wàkula ne Mwanèètù Branham—Muf.] Nzambi àkubènèshè, Mwanèètù wa bakàjì Spencer.

Taatù wa mu Dyulu, mukàjì mukùlākàjì munsantu mukwàte ne byà luse ewu, ne udi musòmbe ewu. Udi umòna mukàjì mucibùkile panshi. “Kabìvwa bìkèngela bwà mwànà wa bakàjì wa Abraham ewu kusùngidiibwayè mu ditùkù dyà Nsabatu anyi?” Nènku mpindyewu pàmwàpa bààbùngì bàà ku balundà bèndè, Mukalenge, balundà bàà cikondo cyà kale bàvwàye ne ciibidilu cyà kuyiikilangana naabò, bambi abu, pàvwàbo basòmbe mu nzùbu mwèndè, bàkaadi bafwè, bààbùngì bàà kudìbo, bàkaadi balonde cibeeba cinène cìyaaya mu Dyulu aci. Mmushààle nkààyèndè, Mukalenge, bu bujaadiki. Kakwèna muntu nànsha umwe mpindyewu to, ànu bânà bèndè, pàmwàpa mulunda wa palepale, Mukalenge, cilongo kampànda ku musangu ne ku musangu. Kàdi mmwimàne nkààya bu diitu dinène divwà dyupùdiibwe panshi, kàdi kushààle ànu mucì ùmwèpelè. Nzambi, ndi ndòmba bwà wìnyìkakù mèsù àà luse, Mukalenge, bwà wèlakù miji mu ndòndò. Nènku mwimàne pa kakùnà kàà Kàlvariyò, Mukalenge, mwelè miji ne mujiikìibwe mu Diitabuuja dyà Kilistò. Ndi ntentekela mukàjì mukùlākàje munanga ewu byanza ne mpiisha dipondo didì mwinshì mwà ludimì lwèndè edi, bwà ne dìmuumùkè ne ikalè musàngàle. Mu Dìnà dyà Yesù Kilistò. Amen. Nzambi àkubènèshè. Twasàkidila, Mwanèètù wa bakàjì Spencer. Necyènzekè. Kùcyèdìku mpatà nànsha mikesè to. Èyo.

Diitabuuja dyànyì nditàngile kuulu Kùdì,
Wèwè Mwànà wa mùkòòkò wà Kàlvariyò,
Musùngidi wa kwà Nzambi;
Mpindyewu ngumvwilèku pàndì nsambila apa,
Umusha mpèkaatù yànyì yònsò,
Anyì kundekediku mpàmbuka
Nya kule Neebè nànsha.

Tèèlejààyi, imbàyi naanyi mpindyewu.

Pàndì ngèndela mu nyongolo wa mîdimà wa
njila mibwelākàne wa pànwapa apa,
Ne bisaamà binyùngùlùke,
Wèwè ikala Mulombodi wanyì;
Tumina mîdimà díyì bwà yàndàmukè muunya,
Kupula binsònji byà dibungama,
Eyì enzà ne kuumukila ku ditùkù edi

Mémè yònsò ngùikalè Webè!

¹²³ Kuumukila mu ndòndò wa mwoyi wèbè mpindyewu, ànu Nzambì ke udi mucimanyè, kuumukila mu ndòndò wa mwoyi wèbè, udi wambilamù menemene cintu aci ne: “Enzàku ne kwambwila ku leelù ewu, Mukalenge, ngùikalè mémè yònsò Webè anyi”? Twimbàyi citùpà cyà ndekeelu aci cyàkàbìdi.

Anyi kùndekèdiku mpàmbuka
Nya kule Neebè nànsha.

¹²⁴ Mpindyewu bònsò cyàpàmwè. Mulami munène wa kasùmbù kàà mìkòòkò, Wèwè wakatùlongesha ne bìvwa bìkèngela bwà twètù kusambila mùshindù ewu:

Taatù wetù Udi mu Dyulu, Dìna Dyèbè
dijidiibwe.

Bukalenge Bwèbè bùlwe. Diswa Dyèbè
dyènzekè pa buloba, bu mùdìdi dyènzeka mu
Dyulu.

Tùpèeshèkù ditùkù edi dyàmpà dyètù dya
bwàcyàbwàcyà.

Ne ùtúfwilè luse ku matomboka ètù, bu
mutùtù tufwila aba bàtù batwènzela pèètù
matomboka luse.

Nènku kùtùfikishì mu mateeciibwa, kàdi
tùsùngile ku bubi; bwalu Bukalenge
m'Bwèbè, ne bukolè, ne butùmbì, bwà
kashidi. Amen.

¹²⁵ Nudi mwà kusòmbaayi. Mbandòmbe disambila bwà mwànà wa Mwanèètù wa bakàjì Shepherd. Ngábùvùluku mu meeji ànu mpindyewu ewu ne bàvwa bambùkile kùkaadi katanci bwà kusambidila mwànà awu, nènku mémè e kumusambidila. Mwva ne muyiiki wà bàbìdi wà kwenza mwab'ewu, kàdi ncìvwa mwà kuyiila ku nzùbu to. Kàdi kwambabò ne mwànà wa bakàjì mutekète awu ùvwa ùsaama ne ùvwa ne mubidi kapyà, mwenze bu uvwa uminyina, cidì kakùyì mpatà to ànu kishì kèètù aka kàdi kènda katàmbakana. Nudi bamanyè bwalu bwàkù's. Míngà misangu misunya yèndè yitù yìdikòka mu mùshindù wà ne bìkèngela nwènù kuyinana kutùma kumpàla kutùma paanyimà ne byanza byèndè abi, bu Màndàmù Haley ne bàabùngi bàà kwínshì eku. Nkìshì kàdi kenda katàmbakana. Nènku yèyè. . . kumusambidila. Kàdi mémè kwamba ne byòbì byenze ne mwànà wa mu dibòko awu kí mmùmvwe bìmpè to pa dîbà citèèmà anyi dîbà ditùtù tukànga disangisha adi, nwatùbùkila kunweku nènku tuvwa mwà kulwila mwaba awu; kàdi mwànà awu yèyè musàngàle, mbikùmbàne. Pa nàнку twánjàayi ànu ne kudipwekesha mpindyewu, kumpàla kwà twètù kwangata mèèsà à Mukalenge, kusambidila mwànà wà.

¹²⁶ Mukalenge Yesù, mwànà mukèsè wa mu dibòkò awu, ncyènà mumanyè bidimu byèndè ànyì bwalu nànsha bùmwè to, kàdi

ngumwe wa ku bayiidi bèètù bananga kaaba aka, Mukalenge, umwe wa ku beena kwitabuuja bèètù. Mmwánaàbò mulela, wa Mwanèètù wa bakàji Shepherd ne Mwanèètù wa balùme Shepherd, cilengà cikesè cy'Údi mubàpèeshe, Mukalenge. Tudi tukulòmba bwà wamutàbaleela, wamubènesha, ne wamukùba, wamwòndapa ne wamusàngaja. Tudi tucinana ànu mpindyewu. Paanyimà pàà diyiisha edi, tudi tucinana. Tudi tucinana bwà butùmbi bwà Nzambi, bilondèshile Diyì Dyèndè. Mu Dîna dyà Yesù Kilstò, swàkù bwà disaamà òlekelele mwànà awu. Nènku swàkù bwà mwànà awu àsangalè ne uumvwè bìmpè, bwà butùmbi bwà Nzambi. Mpindyewu cikaadi cyambiibwe, mpindyewu necyènjiibwe. Amen. Nudi nwitabuuja anyi?

Bitwikalà tweyemena katùyì twela mpatà to,
Yèyè neànùsùngilè;
Twàla bujitu bwèbè kùdi Mukalenge ne
mushilèbu mwaba awu.

Bùshiyè mwaba awu, kaa, bùshiyè mwaba
awu,
Twàla bujitu bwèbè kùdi Mukalenga ne
bùshiyè mwaba awu;
Nwènù nweyemena kanùyì nwela mpatà
nànsha, Yèyè neànùsùngilè;
Twàla bujitu bwèbè kùdi Mukalenge ne
bùshiyè mwaba awu. (Ki cyònsò cinùdi
nwenza aci.)

Piikalà mubidi wèbè wówò ùsaama wèla
mikenyi ne kùyì mwà kupetulula bukolè
bwèbè bwà mubidi to,
Vùlukà ànu ne Nzambi mu Dyulu ùdi
wàndamuna ku disambila;
Mpindyewu, Yesù mmumanyè bìsaamà byùdi
umvwa abi, Údi mwà kusùngila ne Údi mwà
kwondopa;
Twàla bujitu bwèbè kùdi Mukalenge ne
ùbùshiyè.

¹²⁷ Mpindyewu twànjàayi kulabulangana ku cyanza muntu ne mukwèndè patùdi twimba citùmìnyi cyà ndekeelu eci apa.

Bùshiyè mwaba awu, (Bwobùmwe, nudi
bamanyè's, nkòmunyò.) bùshiyè mwaba awu,
(Nzambi àtumbè!)
Twàla bujitu bwèbè kùdi Mukalenge ne
ùbùshiyè mwaba awu;
Patwikalà tweyemena ne katùyì twela mpatà
nànsha, Yèyè neànùsùngilè bushùwà;
Twàla bujitu bwèbè kùdi Mukalenge ùbùshiyè
mwaba awu.

128 Kaa, Yèyè kí mmulenga anyi? Mpindyewu, ne ditonda dyètù mpindyewu, ne diitabuuja dyètù, ne ditonda dyètù dyà mpèkaatù yètù, biikàlè twitabuuja ne mpèkaatù yètù yònsò yìdi mu mbú wa cipwàmwòyì. Ewu wátonda mpèkaatù yèndè, Nzambi ùdi mwakàne bwà kuyilekela cyanààna. Nwamònu anyi? Yidi mu—mu mbú wa Mashi à Yesù Kilistò, kayiciyi mwà kuvùlukiibwa kàbìdì to. Mbanganyi bàà ku nwènù bakàjì bàdì bamanyè cidi clorox? Bònsò bwènù. Mpindyewu, twàngatàayi ànu dilòngò dinène dyà kusukwila bilàmbà dyùlè tèntè ne bwanga bwà Clorox, aci ng'èau de javel, dilòngò dinène dyà kusukwila bilàmbà, dyùlè tèntè ne bwanga bwà Clorox. Nènku pashìishe wèwè kwangata kandundu kàà kumacishila naakù mamata à bwanga mu mèsù, kàdì wèwè kukòka màyi à mufundu mafike mu kandundu kàà dimacishila mamata aku, aci's ke mpèkaatù yèbè. Kàdì kwimana ànu kumutù kwà dilòngò aku, ne kuàkàminamù, pashìishe tàngilàaku mu dilòngò ní waàmònamù. Cidiwu mashààle ncinyi? Màyi à mufundu awu mmashààle cinyi? Pàdiwu ànu àlenga citòòkeshi aci, cìvwa ne bukolè bwàbúngì menemene mu mùshindù wà ne cìvwa cipàtula diikala adi munda mwà màyi à mufundu amu, kaèna mwà kwikalakù kàbìdì nànsha. Ncinyi aci? Ndiyè, ndijimine cyendèlèlè. Ncinyi aci? Màyi à—à mufundu mene awu àdì àlwa bwanga bwà Clorox. Ki Mashi à Yesù Kilistò ngwòwò awu bwà mpèkaatù yònsò mutonda. Ncinyi aci? Mmupwìbwe mwoyi, mmujike, mmupwè, mmumùshìibwe, mmushebèya nendè dibàkà, mmmwimànshìibwe. Kènà mwà kuvùlukiibwa bàkubadilaye kàbìdì nànsha.

129 [Mwanèètù wa bakàjì kampànda ùdi wàkula ne Mwanèètù Branham—Muf.] Muntu kampànda ùdi ùtèèla dìnà dyanyi, mwaba kampànda. [Mwanèètù wa bakàjì awu ùdi ùfila bujaadiki bwà mùdiye mwondòpiibwe.] Èè, Mukalenge àtumbè! Ùcidi ànu ne mwoyi! Twasàkidila Mukalenge. Tudi twela Mukalenge twasàkidila. Èyi Nzambi, mùshindù mwinè wutùdì tuKutumbisha bwà bwìmpè Bwèbè. Èyowà, musùukà mukèsè paanyimà pààpa ùdi mulengiibwe, Mukalenge mmuwùlengè. Èyo. Yèyè m'Mwakwidi Munène udi mwà kulengiibwa kùdì dymvwa dyà mateketa ètù.

130 Vùlukàayi ne, Dìyi dyònsò dìdì Lwongò, lushimàte ne lwà bushùwà. Kakwèna... Nwamònu anyi? Tèèka wèwè ànu diitabuuja dyèbè pa Dyòdì apu ne kùnyungi to, shààla ànu pòpò apu. Mpindyewu, kwènà mwà kuditéeka panshi apu kàdì pashìishe kudyumusha ne kwamba ne: “Nenditèètè kàbìdì to.” Dilààdike mwaba awu. Shààla ànu naadi mwaba awu. Èyowà, mukalenge. Bu mwàkenzà Abèlè, fwàku ku meeji èbè wèwè sungasunga. Ambà ànu ne: “Nzambi, n'Dìyi Dyèbè, kí ncìndì mèmè ngèèla meeji to. N'Dìyi Dyèbè. Ki cyòci aci.” Nènku Abèlè wàkafwila pa Lubwebwe. Nènku, cyòci aci, Yèyè nealengè ànu mùvwàYe mulenge mwanèètù wa bakàjì kuntu kwàka. Bìdì ànu bipeepèlè menemene.

¹³¹ Tudi tuteeta kucyènza...Katwèna mwà kucyenza to. Sàtaanà ùdi ùteeta kucivwija cikòndàkàne menemene, nudi bamanyè's, wàmba ne: "Kaa, nudi bamanyè's, aci civwa bwà ditùkù dimanè kupita," ne byònsò abi. Abu's bàdi ànu beena bupidyà.

¹³² Kàdi kùdì nwénù bàdì biitauuja, Yèyè ngwa mushinga mukolè. Mpindyewu mmubengùbwe, mu bushùwà bwà bwalu; kàdi Yèyè n'Dibwe dyà mushinga mukolè didi dilwa kùdì Dibwe didi ne mwoyi, Dibwe kampànda dyà mushinga mukolè, Dibwe dinèna dyà mu Ditumba. Kaa, ekèlekèle. Kaa, ewu ukàalengi Dibwe edi mmwondòpiibwe! Kwajiki. Amen.

¹³³ Mpindyewu, katwèna ne kusàkidila kùdì Mukalenge anyi? Ànu ne disànkà cyanàanà, ndi ne disànkà dyàbùngi dyà ne Mukalenge udi Nzambì. Amen. Ndi ne disànkà dyàbùngi dyà mùdiYe Taatù wa dinanga, mùlè tètè ne luse, ùneemeka Dìyì Dyèndè, ùlama Cipungidi Cyèndè, kàyì ùCìpwa mwoyi nànsha byà kumòna lufù. Yèyè ùtu ùshààla mukwàte ku Cipungidi Cyèndè. Bikèngela Yèyè àshaale muCikwàte, Yèyè ùdi Nzambì, Yèyè ngwakaCyènza. Yèyè ki Mpokolo wa Bulelèlà bwònsò. Nwamònu anyi? Kakwèna mwà kwikala cintu cikwàbò to ànu Bulelèlà bùdì kabùyì bunyangakaja dìbà dyònsò. Dìyì dyònsò didiYe wàmba kadyèna mwà kupangila to. Nènku edi n'Dìyì Dyèndè. Nènku, Èyi Nzambì, swàkù bwà ditabuuja dyànyi diikalè kadiyì mwà kupangila mu Dyòdi, amen, dìbà adi didi mwà kulwa kadiyì mwà kupangila ànu mùdi Dìyì kadiyì mwà kupangila nànsha, pashùshe Dìyì mu diitabuuja dyà mùshindù awu nedilelè cintu kanà cyònsò cidi Dìyì dyàmba ne neDyènzè aci. Amen. Pa nànu, nkezùlaanyi, Mukalenge. Nteetaanyi, nkezùlaanyi, ngondòpaanyi, nkubàanyi, mbenèshaanyi, mpèèshaanyi luse Lwèbè, ke disambila dyànyi kùdì Nzambì adi. Amen.

¹³⁴ Mpindyewu, nèngìikalè mwà kubala dimwè dyà ku Dìyì mpindyewu, didi disanganyiibwa mu Kolintò wa Kumpàla, nshapità wa 11, mvensà wa 23.

Bwalu ndi mupete kùdì Mukalenge cìndì mème pàanyi munusambulujile aci ne: Bwà ne Mukalenge Yesù bufùkù bùmwebùmwebè...bwàkamutungilàbo abu wàkangata dyàmpà:

Nènku paakasàkidilàYe, wàkadìcibula, ne kwamba ne: Angàtaayi, ne nùdye: eci mmubidi wànyi, wùdi mucibùdùbwe bwà bwalu bwènù: nwìkalàayi nwenza nùnku bwà kumvùluka.

Paanyimà byà mwomùmwebè wàkangata...kàbìdì wàkangata lupànza, ne pàakamanàye kudyà, wàkamba ne: Elu lùdi lupànza lwà dipungila dipyadipyà mu mashi ànyi: elu lwìkalè munda mwènù, misangu yònsò yìnùdì nulùnwa, mbwà kumvùluka.

Bwalu misangu yònsò panùdì nudyà dyâmpà edi, ne nunwà lupànzà elu, nudi nuleeja lufù lwà Mukalenge too ne pàâlwaye.

Ki bwà cinyi ewu yònsò wâdya dyâmpà edi, ne kunwà lupànzà lwà Mukalenge elu, kâyi mukùmbànyine to, neikalè mupiiile bwà mashi, mubidi ne mashi a Mukalenge.

Kàdi muntu àdikenkètè nkàâyendè, kàdi àshiishè kudyà dyâmpà, ne kunwà lupànzà.

Bwalu ewu udi udyà ne ùnwa kâyi mukùmbànyine to, ùdyadya ne ùnwanwa dipiila dyèndè yéyè mwinè, kâyi ùjingulula mubidi wa Mukalenge nànsha.

Bwà bwalu ebu bàábúngì bàdi bàsaama ne biikàle ne butekètè munkaci mwènu, . . . bàábúngì mbalàale tulù.

Bwalu bu twètù mwà kudilumbulwisha twètù biine, katùwwa mwà kulumbulwishiibwa to.

Kàdi patùdì balumbùlwishiiibwe, tudi banyookiiibwe kùdì Mukalenge, bwà katwikadi twàlwà kupishiibwa pàmwè ne bàà pa buloba to.

Ki bwà cinyi, bàna bèètù, díbà dinùdì nudìsangisha bwà kudyà, indìlàngànaayi umwe ne mukwàbò, uh, indìlàngànaayi umwe ne mukwàbò.

¹³⁵ Mpindyewu anyishaayi ngambèku eci. Yesù wàkatùpèèsha díyì ditùma edi kumpàla kwà kuyaYè ku lufù Lwèndè, mumanyè bímpè ne Yéyè ùvwa ùyakù. Bayiidi bàcidi ànu munkaci mwà kudikonka ne ncinyi cìvwàYe wàmba aci, pààkafùndàbo eci. Kàdi Yéyè wàkamba ne: “Lupànzà elu n’Cipungidi Cìpyacìpyà cyà Mashi Àanyi. Panùdì nwenza nùнку misangu yònsò yinùdì nudìdyà ne nulùnwà, nudi nuleeja lufù Lwànyì too ne paNgàâlwa.” Kaa, Mèyi à musinga mukolè awu’s!

¹³⁶ Bayiidi kakùyì mpatà to bààkadikonka ne: “CìdiYe ùswa kwamba ncinyi, ‘kuleeja lufù Lwèndè’? Mmuniyì mutùdiku mwà kucyèenza?” Eci cyònsò cìvwà bwalu busokoka kùdìbo, kàdi kí nkùdiYe to. Yéyè ùvwa Nzambì. Ùvwa mumanyè cìdiYe ne cyà kwenza. “Kuleeja . . .” Ki kwambaYè ne: “Panwàdisangisha bwà kudyà . . .”

¹³⁷ Mpindyewu, “Ewu udi udyà ne ùnwa, kâyi mubikùmbànyine to,” ùlwa mwab’ewu ùjikula mùdiye mwena Kilistò, wàngata mubidi wà Mukalenge, ne pashiishe ùpàtuka ne wènda ne bàà pa buloba ne—ne ùvila Kilistò ne bukolè Bwèndè, ne bintu byà mùshindù awu, udi—udi ufwishà Nzambì bundù bunène. Wèwè—wèwè udi ufwishà Kilistò bundù, pa nàнку kudidì to. Kàdi wèwè uteeta ne byònsò bìdì munda mwèbè abi, bwà kwikala ne nsòmbelu mujaalàme ne kuleeja ne udi mwena Kilistò, bwà ne udi munange Yesù Kilistò, díbà adi mmudimu wèbè bwà wèwè kucyèenza.

138 Nènku mpindyewu mu . . . Ngèèla meeji ne n'Yone Munsantu, nshapità mwi6, Yesù wàkamba ne: “Ewu yónsò udi udyà Mubidi Wànyì ne ùnwa Mashi Àànyì ùdi ne Mwoyi wà kashidi, ne Mémè némubiishè ku lufù ku ditùkù dyà ndekeelu.” Mpindyewu, mulayì awu, kí ncintu cyà butùmbi anyi? “Mémè némumujuulè.”

139 Nukààdikù kacya beelè meeji bwà cinyì nudi mwab'ewu anyi? Cinùtù—cinùtù nuyiila mu kàlaasà ncinyi, nwènù bânà? Cyùdi wenzela mudimu ncinyi, papa? Ncinyi citù cikujuudija panshì, ne maamù, ne dindà bwé, ne kukafila bânà mu kàlaasà, ubwòweshà màyi kwisù, ne ulongolola malààlu ne ulàmba, ne—ne—ne wenza byónsò abi? Ubwela, mupoyòyonge yónsò dilòòlò adi, kàdi ditùkù didi dilonda kubangulula cintu cimwècimwè aci. Cyùdi ucyènzela ncinyi? Bwà cinyì udi ukwàta mudimu mukolè wà bupika, papa, ne byónsò abi? Walukila dilòòlò, mwinè awu muzengèle, ne umwe wa ku bânà ùsaama ne wèwè kwenda kudikòka panshì ne kusambila ne kulwangana, ne ùsàngala; pashiishe wàlukila, nènku wèwè kucyènza cyàkàbidì. Kàdi mu dyàlumingu dyónsò ubwòweshà màyi kwisù, ne uya naabù mu èkèleeziyà. Nènku, èè, byónsò abi mbwà cinyi? Udi apa bwà cinyi? Kí cyónsò cidiku bwà bwalu abu anyi? Ekèlekèlè, aci ncifwànyine kwikala cyà cyènza luse, pèèbè mumanyè ne udi ne cyà kuya nànsha bishi. Nwamònu anyi? Byónsò abi mbwà cinyi?

140 Kaa! Mwanèètù, ncikondo cyà didikenketa, ncikondo cyà mpùngà mukùpà's! Mmpùngà wa kwitaba Cyòcì eci. Ngambilaaku cintu kampànda cidì mwà kwangata kaaba kaaCì. Ngambile cintu cidì citàmbe bwìmpè kupità Cyòcì aci. Leejàayi ní ncinyi pa buloba, ikale mfùmù wa buloba, ukòòkesha buloba bujimà, ikale Khrushchev anyi Kennedy, anyi ní ncinyi cyónsò cinùdi baswè kwikalaci aci, neufwe ànu mshindù ùmwèùmwè. Mwómò! Kwèna mumanyè dyàlwàlu to, mu kasunsa kanà kónsò. Kàdi mwab'ewu, dìbà didi lufù lùkùma, udi ne Mwoyi wà Cyendèlèlèlè ne kwèna mwà kufwà to, ne cishindikì cyà kùdì Nzambi wa bufùki bwónsò, Udi Mwena Maulu ne buloba ne: “Némumujuulè ku ditùkù dyà ndekeelu.”

141 Nkwacisheku ku bupidyà bwànyì, Èyi Nzambi. Úja musùukà wànyì, Èyi Nzambi, nkezùleku, ngùjaaku, ùmpàyè, kàdi ùntùmè pambèlu. Kùndekèdì mfwa to, ndekèle ne mwoyi bwà ndonde Bwalu ebu. Ndekèle nye mu mutanta wónsò ne mu ditumba dyónsò dyà buloba, bwà kuyiisha Dìyi ne kumyamina dimiinu, èyowà's, mukalenge, bwà kwikale dinowa mu ditùkù dyà ndekeelu, dyà Dìyi dilelèlè kadiyi disambakaja to, ne beena kwitabuuja mu Kilistò.

142 Mpèkaatù yèbè yidi mwinshì mwà Mashi, ku diitabuuja dilòòlò edi mu Kilistò Yesù anyi? Netwàngatè mèèsà à Mukalenge mpindyewu. Kí mmèèsà à Mukalenge to; nudi nwenda nuyiikila panùdì nudyà muntu ne mukwèndè apu. Kuyiikila ànu ne Nzambi. Mèèsà à Mukalenge kí ndyàmpà to, kí mvinyò to, mèèsà à Mukalenge adi “kuyiikilangana ne Nzambi mpàla ne


nyimà.” Nènku citùdì twangata eci ncimanyishilu, cyà ne tudi twitabuuja mu lufù Lwèndè, mubidi mucibulula, dijiikiibwà ne dibìikà Dyèndè dyà ku lufù, tudi twitabuuja Bwikadi bwà Nyumà Mwímpè. Ne tudi twitabuuja ne Yèyè mmutùpèeshe Mwoyi wà Cyendèlèlè ne katwèna mwà kufwà to, tukàadi bamanè kuumuka ku lufù bayè ku Mwoyi. Nènku ditùkù kampànda patwàtápùlukà muntu ne mukwèndè mwab’ewu, netùbiike kàbìdì ku lufù ne muntu ne mukwàbò, baswikiibwe pàmwè ne Kilstò Yesù, bu Mubidi. Amen. Pa bishimikidi ebi, ne ditonda dyà mpèkaatù yànyì, ne diitabuuja dyànyì mu Mwànà wa Nzambì, Ndi ngàngata mèmè mwinè ne èkèleeziyà kumpalà kwà bintu ebi bìdì Nzambì mutùshìile bwà twètù kwenza, bwà kuleeja lufù Lwèndè too ne pàalwàYe.

143 Yesù wàkamba ne: “Eci mmubidi Wànyì ùdì mucibula bwà bwalu bwènù. Dyàyi, enzàayi nùku bwà kuMvùluka.”

144 Taatù wetù wa mu Dyulu, paanyimà pàà twètù bamanè kutonda mpèkaatù yètù, kutèeleja Dìyì Dyèbè, paanyimà pàà twètù bamanè kutonda ne katwèna tukùmbàna to, nènku tudi tweyemena ànu dikùmbànyina dyà Mwànà wa Nzambì. Twètù tudi bifùkiibwà bìdì kabìyì bikùmbànyine to. Tùfwilèku luse, Mukalenge, bwà byònsò bitùdì benzè abi. Nènku mpindyewu, ku diitabuuja, tudi tulwa ku mèèsà à Mukalenge. Nènku mpindyewu bu mùdì dyàmpà edi ndileejìibwe bwà kuleeja mubidi wà Mukalenge wetù, ndi ndòmba, Taatù, bwà Wèwè kudjidila mu kiipàcilà kàadi kàà mudimu aku. swàkù bwà muntu yònsò udi wabanyangana dyòdì edi ikalè ne Mwoyi wà Cyendèlèlè mu musùkà wèndè. Nènku swàkù bwà muntu yònsò udi udidya ikalè ne dyondopa mu mubidi wèndè, ne ikalè ne mwoyi mu cikondo cimukòsela cy’Ùdì mumupèeshe. Ne swàkù bàkusadilè Wèwè matùkù àbò ònsò à mwoyi, bwà bàbiishiibwe mu ditùkù dyà ndekeelù mu dibìika dyà ku lufù, bwà kudisanga pàmwè ne bisàmbà byà pa buloba bìdì bipikula ku Mashi à Kilstò. Enzàku nànkù, Mukalenge, mu Dìnà dyà Yesù mmutùdì tucilòmbela nùku. Amen.

145 Bible mwàmbè ne: “Kàbìdì wàkangata lupànza, ne Yèyè mumane kudyà, kwamba ne: ‘Elu ndupànza lwà Cipungidi Cipyacìpyà, misangu yònsò yinùdì nulùnwa nudi nuleeja lufù lwà Mukalenge too ne mwàlwàYe.’”

146 Taatù wa mu Dyulu, tudi tuKutwàdila mamuma à mvinyò dilòlò edi, mvinyò ewu. Nènku tudi tulòmba, Taatù wa mu Dyulu, bwà Wèwè kujidila mvinyò ewu, ùdì ùleeja Mashi àkeediibwà panshì ku Kàlvariyò. Ku Mashi aa tudi ne dilekelediibwa dyà mpèkaatù yètù, ku diitabuuja mu mudimu mwowela byanza wà Yesù Kilstò. Tùfwilèku luse ku bwètù. . . bupidya bwètù bwònsò, Mukalenge, ne tùpèeshèku diitabuuja ne luumvu, ne tùvwijèku basadidi Bèèbè, Mukalenge, bwà twamònakù mwà kuKukwàcila mudimu matùkù ètù ònsò. Ikàlàku neetù, Taatù, patùdì tudisanga pàmwè ku nyùngulukilu

wa mèèsà aa apa, ne tùbènèshèku mu bwobùmwè bwímpè ebu ne dyumvwangana Neebè. Nènku swâkù wàkule ne myoyi yètù ne ùtùfunkwine mudimu wètù utùvwà ne cyà kwenza. Enzàku nàнку, Mukalenge. Jidilaaku mvinyò ewu bwà kiipàcilà kèndè kamana kulongolola. Mu Dîná dyà Yesù Kilistò mmutùdi tulòmba nùнку. Amen. 

62-0506 Kukòòkesha Bintu Byònsò
Branham Tabernacle
Jeffersonville, Indiana États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilsto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org